

明覺禪師語錄卷第一

綺三

參學小師惟蓋竺編

住蘇州洞庭翠峯禪寺語

師在萬壽開堂日白槌了師云宗乘一唱三
藏絕詮祖令當行十方坐斷其有達士不避
死生貶上眉毛出衆相見問人天普集佇聽
雷音學人上來乞師垂示師云十萬八千不
是遠進云恁麼則大衆霑恩也師云後五日
看問師唱誰家曲宗風嗣阿誰師云分明記
取進云恁麼則昔日智門今朝和尚師云有

甚麼交涉問如何是和尚爲人一句師云量
才補職學云謝師方便師云自領出去師乃
云一問一答總未有事在直饒乾坤大地草
木叢林盡爲衲僧異口同聲各置百千問難
也不消長老彈指一下並乃高低普應前後
無差曠祖佛之妙靈廓天人之幽迹如是則
何假覺城東際五衆咸居古佛廟前此時參
畢

綺三

師在杭州靈隱受疏了衆請陞座時有僧問
寶座先登於此日請師一句震雷音師云徒

勞側耳進云恁麼則一音普徧於沙界大衆無不盡咸聞師云忽有人問爾作麼生舉僧云三十年後敢爲流芳師云賺了也師乃云天下絕勝之覺場靈隱導師之廣座暫借卑僧陞陟會愧非材豈敢於五百員衲子前提唱佛祖抑揚古今銜耀見知恥他先作假饒說得天雨四華地分六震於曹溪路上一點使用不著何以行脚高士有把定世界函蓋乾坤底眼誰敢錯悞絲毫其知有者必共相悉

師在靈隱諸院尊宿茶筵日衆請陞座僧問禪侶盡臨於座側未審師還說也無師云寰中天子塞外將軍進云恁麼則一震雷音滿大唐也師云看取令行師乃云上士相見一言半句如擊石出火瞥爾便過應非即言定旨特三滯句迷源從上宗乘合作麼生議論直得三世諸佛不能自宣六代祖師全提不起一大藏教詮注不及所以棒頭取證喝下承當意句交馳並同流浪其有知方作者相共證明

師到蘇州日僧俗迎在萬壽衆請上堂問向上一路千聖不傳和尚從何而得師云將謂是衲僧學云恁麼則大衆霑恩學人禮謝也師云龍頭蛇尾問選佛場開還許學人選也無師云切忌點額學云恁麼則心空及第歸也師云堦下漢師乃云如天普蓋似地普擎有如是自在具如是威德誰不承恩誰不景慕過去諸聖於無量劫勤苦受盡所得秘要法門今將普示大衆不用纖毫心力各請一時驗取於此薦得便能永出四流高步三界

其或不知剛是諸人諱却

師初到院陞座僧問杖錫已居於此日請師一句定乾坤師云百雜碎進云恁麼則海晏河清去也師云非公境界問如何是佛法大意師云龍吟霧起虎嘯風生問如何是祖師西來意師云山高海闊進云學人不曾師云緊峭草鞋師乃云未來翠峯多人疑著及手親到一境蕭然非同善財入樓閣之門暫時歛念莫比維摩掌中世界別有清規冀諸人飽足觀先以資欣慰

結三

三

上堂問答罷師乃云釋迦已滅彌勒未生正當今日佛法委在翠峯放開捏聚總由者裏放開也七縱八橫是處填溝塞壑捏聚也天下老和尚盡在拄杖頭不消一剎

上堂僧問如何是實學底事師云針劄不入進云乞師方便師云水到渠成問如何是教外別傳一句師云看看臘月盡學云恁麼則流芳去也師云癡子喫苦瓜問言迹之興異途之所由生不犯鋒銛請師道師云誰家無白月清風進云還當也無師云土上加泥漢師

乃云劒輪飛處日月沉輝寶杖敲時乾坤失色衆魔從茲膽裂千聖由是眼開其如二聽不圓震迅雷而莫覺孤根將敗霈春雨以非滋致使凡聖岐分悟迷孤列奔馳七趣汨沒四流重業相纏無有休日爾諸禪德覬善衆詳如人上山各自努力

上堂僧問昭昭於心目之間而相不可覩晃晃在色塵之內而理不可分旣於心目之間爲甚麼不覩其相師云華須連夜發莫待曉風吹進云恁麼則雲散家家月師云毗婆尸

佛早留心僧方禮拜師以拄杖打一下云不得放過問猿抱子歸青嶂後鳥銜華落碧巖前古人意旨如何師云夾山猶在學云和尚如何師云依稀似曲纔堪聽又被風吹別調中僧却問如何是翠峯境師云春至桃華亦滿溪僧禮拜師云山僧今日敗闕有人點檢得出許他頂門上一隻眼便下座

第三

學云請師相見師云任是顏回亦不通師乃云立賓立主剗肉作瘡舉古舉今拋沙撒土直下無事正是無孔鐵槌別有機關合入無間地獄明眼衲子應須自看

上堂僧問古人一喝不作一喝用是否師云是僧便喝師便棒僧無語師云謔我問古人道有佛法處不得住無佛法處急走過意旨如何師云氣急殺人僧擬議師云甚麼處去也問只在目前爲甚麼再三不覩師云截耳卧街僧云恰是師云令我攢眉問黑豆未生

芽時如何師云餒驢餒馬進云生後如何師云透水透沙僧禮拜師云一似不齋來問功巧諸技藝盡現行此事如何是此事師云諸方勝樣進云莫便是學人會處也無師云有頭無尾漢師乃云過去諸如來斯門已成就

特三

五

放過一著現在諸菩薩今各入圓明兩重公案未來修學人總被翠峯穿却鼻孔

上堂云智者聊聞猛提取莫待須臾失却頭問丹霄獨步時如何師云脚下踏索進云天

下橫行去也師云徐六擔板問學人乍入叢

林諸事不會未審師還拯濟也無師云蘇州紙貴進云和尚豈無方便師云腦後拔楔師云爐鞴之所固無鈍鐵良醫之門誰是病夫向後鼻孔遼天莫辜負人好

上堂云欲得不招無間業莫謗如來正法輪便下座

上堂纔有僧出禮拜師云大眾一時記取者僧話頭便下座

上堂大眾雲集以拄杖拋下云棒頭有眼明如日要識真金火裏看

上堂云從天降下從地湧出南北東西一棚
俊鶻顧杼停機苦屈苦屈

上堂云古人道譬如擲劍揮空莫論及之不
及斯乃空輪絕跡劍刃非虧好諸禪德若能
如是心心無知即是踞妙峯孤頂非但善財

七日不逢設使文殊百劫親來也摸捺不著
上堂有僧出禮拜了方伸問師云啼得血流
無用處便下座

上堂云藏鋒劍客便請施呈有僧方出來師
云什麼處去也便下座

上堂云語漸也返常合道且任諸人點頭論
頓也不留朕跡衲僧又奚爲開口師以拄杖
一劃云上無衝天之計下無入地之謀蔡州
千箇萬箇打破只在須臾

上堂問答罷乃云映眼時若千日萬像不能

三

六

逃影質凡夫只是未曾觀何得自輕而退屈
師拈起拄杖云把定世界不漏絲髮還觀得
也無所以雲門大師道直得乾坤大地無纖
毫過患分只是轉句不見一色猶爲半提直
得如此更須知有全提時節諸上座翠峯若

也全提盡大地人並須結舌放一線道轉見不堪以拄杖一時趲下

上堂僧問如何是翠峯境師云有眼底見學云如何是境中人師云貪觀白浪失却手橈問如何是和尚家風師云客來須看進云恁麼則學人得見也師云三十年後問如何是第一義師云道士倒騎牛學云乞師再垂方便師云無孔鐵樵問道遠乎哉師云青山夾亂流學云恁麼則得聞於未聞去也師云千里萬里師乃云大衆前共相誦唱也須是箇

漢始得若未有奔流度刃底眼不勞拈出所以道如大火聚近著則燎却面門亦如按太阿寶劒衝前則喪身失命師乃頌云太阿橫按祖堂寒千里應須息萬端莫待冷光輕閃爍復云看看便下座

時三

拈古

舉米胡問僧近離甚處僧云藥山米云藥山近日如何僧云大似頑石一般米云得恁麼鄭重僧云也無提撥處米云非但藥山米胡亦恁麼僧近前顧視而立米云看看頑石動

也其僧便出師拈云米胡也縱奪可觀爭奈死而不弔

舉罽賓國王仗劍詣師子尊者所乃問師得蘊空否尊者云已得王曰可施我頭尊者曰身非我有豈況於頭王遂斬之白乳高丈餘王臂自落師拈云作家君王天然有在

舉鏡清於僧堂前自擊鍾子云玄沙道底玄沙道底時有僧出來云玄沙道什麼鏡清作一圓相僧云若不从衆爭知恁麼清云還我草鞋錢來師拈云泊被打破蔡州

舉寶公云終日拈香擇火不知身是道場玄沙云終日拈香擇火不知真箇道場師拈云一對無孔鐵槌

舉五通仙人問佛云佛有六通我有五通如何是那一通佛召五通仙人仙人應喏佛云那一通爾問我師云老胡元不知有那一通却因邪打正

舉思和尚令石頭送書去讓和尚處云迴日與子箇鋤斧子住山去石頭纔到讓和尚處便問不慕諸聖不重己靈時如何讓云子問

太高生何不向下問將來石頭云乍可永劫
沉淪不求諸聖解脫便歸思和尚問書達否
石頭云書亦不達信亦不通去日蒙和尚許
鉏斧子便請思垂下一足石頭便禮拜師拈
云石頭泊擔板過却又云大小讓師不解據

鈎三

令

舉長髭到石頭處頭問什麼處來髭云嶺南
來石頭云大庾嶺頭一鋪功德還成就也未
髭云成就久矣只欠點眼石頭云莫要點眼
麼髭云便請石頭垂下一足髭便禮拜石頭

云見什麼道理便禮拜髭云如紅爐上一點
雪石頭便休師拈云無眼功德有什麼點處
德山和尚到龍潭問久響龍潭及手到來潭
又不見龍又不現龍潭云子親到龍潭德山
便休去師拈云將錯就錯又云大小德山

師一日因事舉徃日有老宿一夏不為師僧
說話有僧自歎云我只恁麼空過一夏不望
和尚說佛法得聞正因兩字也得老宿聊聞
云聞黎莫暫速若論正因一字也無恁麼道
了扣齒云適來無端恁麼道隣壁有老宿聞

云好一釜羹被兩顆鼠糞汚却師拈云誰家鍋釜無一兩顆

觀和尚見新到來觀作麵引次示之其僧便去觀晚間問第一座今日新到在什麼處第一座云當時去也觀云是即是只得一楸師

拈三

九

拈云老觀大似失錢遭罪

舉外道問佛不問有言不問無言世尊據坐外道禮拜云世尊大慈大悲開我迷雲令我得入外道去後阿難問佛外道有何所證而言得入佛云如世良馬見鞭影而行師拈云

邪正不分過猶鞭影

傳大士云夜夜抱佛眠朝朝還共起起坐鎮相隨如身影相似要識佛去處只者語聲是玄沙云大小傳大士只認得箇昭昭靈靈師拈云玄沙也是打草蛇驚

寶公令人傳語思大和尚何不下山教化衆生目視雲漢作什麼思大云三世諸佛被我一口吞盡何處更有衆生可度師拈云有什麼屎臭氣

趙州云至道無難唯嫌揀擇纔有語言是揀

擇是明白老僧不在明白裏是爾作麼生護
惜時有僧問云旣不在明白裏護惜箇什麼
州云我亦不知僧云和尚旣不知爲什麼道
不在明白裏州云問事即得師拈云趙州到
退三千

南泉示衆云三十年來牧一頭水牯牛欲擬
東邊放不免侵他國王水草欲擬西邊放不
免侵他國王水草不如隨分納些子免被官
主勞撓長慶云爾道南泉前頭爲人後頭爲
人雲門云且道牛內納牛外納直饒道得納

處分明我更問你牛在甚處師拈云一時穿
却

鄧隱峯在襄州破威儀堂只著襯衣於砧槌
邊舉槌云道得即不打于時大衆默然隱峯
便打一下師拈云果然果然

綺三

十

僧問玄沙大耳三藏第三度爲什麼不見國
師玄沙云爾道前來兩度還見麼師拈云敗
也敗也

室中舉古

舉睦州問僧近離甚處僧云河北睦州云河

北有箇趙州和尚曾到麼僧云某甲近離彼中睦州云趙州有何言教示徒僧云每見新到便問曾到此間來麼云曾到趙州云喫茶夫忽云不曾到趙州亦云喫茶去睦州云慚愧却問僧趙州意作麼生僧云只是一期方便睦云苦哉趙州被爾將一杓屎潑了也便打睦州却問沙彌爾作麼生沙彌便禮拜睦州亦打其僧往沙彌處問適來和尚打爾作什麼沙彌云若不是我和尚不打某甲師云者僧克由巨耐將一杓屎潑他二員古佛諸

上座若能辯得非唯趙睦二州雪屈亦乃翠峯與天下老宿無過若道不得到處潑人卒未了在

舉僧問長慶如何是正法眼慶云有願不撒沙保福云不可更撒也師云夫宗師決定以

結三

十一

本分相見不敢撒沙且那箇是諸人正眼不受人瞞底漢出來對衆道看共相知委若道不得翠峯一一與爾點過開眼也著合眼也著

舉黃蘗有六人新到五人作禮其中一人提

起坐具作一圓相。禪云：我聞有一獵犬甚惡。僧云：尋羶羊聲來。禪云：羶羊無聲。到汝尋僧云：尋羶羊跡來。禪云：羶羊無跡。到汝尋僧云：尋羶羊蹤來。禪云：羶羊無蹤。到汝尋僧云：恁麼則死羶羊也。黃檗便休。到來日上堂云：獵犬在甚處。僧便出來。禪云：昨日公案未了。老僧休去。你作麼。生僧無語。禪云：將謂是本分衲子。元來是義學沙門。以拄杖打出師云：只如聲響蹤跡。既無獵犬。向甚處尋逐。莫是絕聲響蹤跡。見黃檗麼。諸禪德要明陷虎之機。

也須是本分衲子。舉外道問佛：不問有言，不問無言。世尊良久。外道云：世尊大慈大悲，開我迷雲，令我得入。師云：諸禪德，迷雲既開，決定見佛，還許他同。叅也無若共相委。知則天下宗師並爲外道伴侶。如各非印證，則東土衲僧不如西天外道。舉龍牙和尚問翠微：如何是祖師西來意。翠微云：與我過禪板來。牙取禪板與翠微接得。便打牙云：打即任打，要且無祖師意。後又問。

臨際如何是祖師西來意際云與我過蒲團
來牙取蒲團與臨際接得便打牙云打即任
打要且無祖師意師云臨際翠微只解放不
解收我當時若作龍牙待伊索蒲團禪板拈
得劈曾便擲

編三

十二

舉裨樹問定山不落數量請師道定山提起
數珠云是落不落樹云圓珠三竅人人有請
師圓前話山便打裨樹便去定山云三十年
後槌曾大哭去在裨樹果後開堂示衆道三
十年前被定山老子瞞我一上不同小小師

云定山用即用爭奈險裨樹知即知要且未
曾具擇法眼試請辯看

舉雪峯問投子一槌便成時如何投子云不
是性慇懃漢峯云不假一槌時如何投子云者
漆桶師云然則一期折挫雪峯且投子是作
家爐鞴我當時若作雪峯待投子道不是性
懃漢只向伊道鉗槌在我手裏諸上座合與
投子著得箇什麼語若能道得便乃性懃平
生光揚宗眼若也顛顛頂上一槌莫言不道
舉趙州問僧曾看法華經麼僧云看來州云

衲衣在空閑假名阿練若誑惑世間人爾作
麼生會其僧擬禮拜州云爾披衲衣來麼僧
云披來州云莫惑我僧云如何得不惑去州
云莫取我語師云大小趙州龍頭蛇尾諸人
若能辯得便乃識破趙州如或不明箇箇高

增三

十三

擁衲衣莫惑翠峯好

舉長髭問僧甚處來僧云九華控石菴髭云
菴主是什麼人僧云馬祖下尊宿髭云名什
麼僧云不委他法號髭云他不委爾不委僧
云尊宿眼在甚處髭云若是菴主親來今日

也須喫棒僧云賴遇和尚放過某甲髭云百
年後討箇師僧也難得師云是則二俱作家
要且只解收虎尾不能據虎頭若使德山令
行並須瓦解

舉保福示衆云此事如擊石火閃電光搆得
搆不得未免喪身失命僧便問未審搆得底
人還免喪身失命也無保福云適來且致闍
黎還搆得麼僧云若搆不得未免大衆笑保
福云作家作家僧云是什麼心行福云一杓
屎攔面潑不知臭師云諸上座保福有生擒

虎兇底爪牙者僧也不易相敵雖然如此要
且放過保福一著只如翠峯與大眾還許諸
方檢責也無若免不得平地上死人無數其
中有得活底麼師拈起拄杖云來也來也
舉歸宗鋤草次見一條蛇以鋤斬之僧見便

問久響歸宗元來是箇麤行沙門宗云爾麤
我麤後雪峯問德山古人斬蛇意旨如何德
山便打雪峯便走德山召云布衲雪峯回首
德山云他後悟去方知老漢徹底老婆心師
云歸宗只解慎初不能護末德山頗能據令

且未明斬蛇師召大眾云看翠峯今日斬三
五條以拄杖一時打下

勘辯

問僧甚處來僧云和尚問誰師云我問爾僧
云何不領話師云翠峯今日敗闕

均三

十四

寶華侍者來看師師問寶華多少衆侍者云
不勞和尚如此師云我好好問爾勅越作什
麼侍者云不得放過師云真師子兒喫茶了
師把住云適來得恁麼無禮侍者擬議被師
一掌云歸去分明舉似寶華

有數人新到至師云新到那僧云是師云叅堂去僧便去師復喚來來其僧却迴師云洞庭難得師僧與爾一碗茶喫

問僧甚處受業僧云天章師云將得蘭亭記來麼僧云爭敢呈似和尚師云草本不勞拈出

五人新到師云洞庭絕頂無行路不假梯航速道看僧云特來禮拜和尚師云湛水停舟徒誇運濟僧無語師云過者邊來其僧齊過師云將頭不猛候累三軍叅堂去

問僧名什麼云義懷師云何不名懷義僧云當時致得師云誰與汝安著僧云某甲受戒來十年也師云行脚費却多少草鞋僧云和尚莫瞞人好師云我也沒量罪過爾作麼生僧無語師云脫空謾語漢便打

師三

十三

問新到近離甚處僧云興教師云達磨一宗掃土而盡僧無語師云天上天下唯我獨尊復問僧闍黎名什麼僧云宗雅師云雅即不問作麼生是宗僧無對師云且限三日其僧頻來下語師皆不諾僧却問某甲見處只恁

麼和尚作麼生師云爾何不問我僧方擬問
被師連打數下

問新到發足甚處僧拍掌一下師云兩重公
案僧云恰是師便喝僧無語師云還我一拍
來僧擬議師云瞎漢叅堂去

六人新到師問叅頭云爲上將須是七事隨
身兩刃交鋒作麼生僧云久響翠峯有此一
著師云一著放過還我草鞋錢來僧喝師便
棒僧約住拄杖與師一拍師云未到翠峯與
爾二十棒了也僧無語師云且在一邊却問

第二副將作麼生僧茫然師云一狀領過喫
茶了師把住叅頭云適來公案者裏即恁麼
堂中作麼生舉僧擬議師打一坐具推出
雪峯和尚塔銘并序

夫從緣有者始終而成壞非從緣得者歷劫
而常堅堅之則在壞之則捐雖然離散未至
何妨預置者哉所以疊石結室翦木合函般
土積石爲龕諸事已備頭南脚北橫山而卧
惟願至時同道者莫違我意知心者不易我
志深囑載囑幸勉勵焉縱饒他日邪造顯揚

豈如當今正眼密弘善思之審思之師註

兄弟添十字云國無二君同心著一儀云風行草

偃又云直與土主曰松山云四顧匪絕又云看卵塔號難提

倚又云云獨露相更有胡家曲云一西一東汝等切

須知云自南自北我唱泥牛吼云聞莫舉頭又云呵呵

汝和木馬嘶云見應合眼但看五六月云豈可徒

然又云吁冰片滿長街云事非草薪盡火滅後云去

去誰同又云好住密室爛如泥云須到如此

受師號上堂僧問皇恩已降海衆同觀學人上來願聞舉唱師云好音在耳人皆聽進云

聽後如何師云問著元來總不知僧云學人到者裏實謂不知師云許爾是箇草賊復云禪家流還如戰將見闢勇健索不來即便擒下雖一期之作爭似借水獻華唱太平歌好夜雨山草滋爽籟生古木閑吟竺仙偈勝於嚼金玉蟋蟀啼壞墻苟免悲局促道人優曇華迢迢遠山綠是知道無不在誰云閒然故天有道以輕清地有道以肅靜谷有道以盈滿君有道以敷化故我今上皇帝金輪統御敵澤霽流草木禽魚無遠不及巖野抱疾之

士俄承寵光此生他生無以云報賢守司封
高扶堯舜下視龍黃龍千載之雅風鎖萬邦
之春色佇當明詔別振休聲貳車屯田諸廳
朝宰不敢飾辭褒讚仲尼言云吾禱久矣

住明州雪竇禪寺語

第一

十七

師開堂日於法座前顧謂大眾云若論本分
相見不必高陞寶座乃以手指一劃云諸人
隨山僧手看無量諸佛國土一時現前各各
子細觀瞻其或涯際未知不免拖泥帶水即
便陞座僧正宣疏了維那白槌云法筵龍象

衆當觀第一義時有僧出來師乃約住云如
來正法眼藏委在今日放行則瓦礫生光把
定則真金失色權柄在手殺活臨時其有作
者相共證據僧乃問遠離翠峯祖席已屆雪
竇道場未審是一是二師云馬無千里謾追
風進云與麼則雲散家家月也師云龍頭蛇
尾漢問德山臨濟棒喝已彰和尚如何接人
師云放過一著僧擬議師便喝僧云未審只
與麼別有在師云射虎不真徒勞沒羽問布
髮掩泥因底事全身半偈爲誰施師云天上

天下唯我獨尊進云若然者立雪豈能傳妙旨三拜伸後始爲親師云莫亂統問梵王請佛蓋爲羣生學士請師當爲何事師云相識滿天下進云與麼則大衆霑恩也師云你分上作麼生進云學士證明師云未在有俗士問十方同聚會箇箇學無爲此是選佛處心空及第歸如何得及第去師云徒遭點額進云如此則辜負平生也師云教休不肯休問一焚龍鬬萬像咸臻未審是何境界師云金殿草漫漫進云向上更有事也無師云白雲

千里萬里問吹大法螺擊大法鼓朝宰臨筵如何即是師云清風來未休進云與麼則得遇於師也師云一言已出駟馬難追僧禮拜師云放過一著師又普觀大衆一迴乃云人天普集合發明箇什麼事焉可互分賓主馳騁問答便當宗乘去廣大門風威德自在輝騰今古把定乾坤千聖只言自知五乘莫能建立所以聲前悟旨猶迷顧鑑之端言下知宗尚昧情識之表諸人要知真實相爲但以上無攀仰下絕己躬自然常光見前箇箇壁

立千仞還辯明得也無未辯辯取未明明取
既辯明得能截生死流同踞祖佛位妙圓超
悟正在此時堪報不報之恩以助無爲之化
師在翠峯受疏日洞庭檀越與明州專使相
爭紘紘不已師乃陞座普告大衆不須作鬧
事在況僧家也無固無必住則孤鶴冷翹松
頂去則片雲忽過人間應非彼此殊源動靜
乖趣今與諸人評議念三二年洞庭晦迹承
四遠信心恩顧棲衆方諧舊轍藏教復乃新
歸豈可知感頓忘遽致前邁誠爲不可而又

四明太守星馳介使輜重俄臨既已跋涉數
州迢遞千里投誠苦逼一至於斯進退審詳
不能自決敢問大衆住翠峯好往雪竇好于
時衆僧高聲云往雪竇好師乃顧謂洞庭諸
檀越云不用爲訝宜各知時且佛法委自王
臣兼住持亦以緣斷在彼在此本無間然希
披疏文以塞來命便下座

第三

十九

永樂北藏

明覺禪師語錄

第一五五冊

行而不住未有長住而不行古之今之各有
攸往且如茲院僻處一隅若非念報佛恩無
以四來居此恐山僧進發之後法席空虛今
命素公開士接續住持幸冀衆慈同心勸請
師辭翠峯上堂僧問承學士有言輟翠峯之
祖席登雪竇之道場如何是不動尊師云下
坡不走快便難逢進云與麼則動若行雲止
猶谷神師云你須緊峭草鞋師乃云山僧斯
者抑徇彼請難可稽留束裝告行但多攀感
況住持久煩勤舊備認歲寒希各務道專致

以副誠祝其有參隨諸高士動逾千里俯近
百僧忽齋粥踈遺船車隘窄異相回互禪悅
自貽則佛國徧遊亦不爲遠何以諸禪德去
來不以象故無器而不形動靜不以心故無
感而不應然則心生於有心象出於有象象
非我出故金石流而不焦形非我生故日用
而不勤紘紘自彼於我何爲請諸人高挂征
帆不勝珍重

師到萬壽衆請上堂僧問七事隨身便請相
見師云打退鼓進云方始交鋒已見大敗師

云噓僧擬議師便喝者般漢有什麼死急問
翠峯一箭已射雪竇雪竇一箭當射何人師
云不爲鼯鼠發機進云非但聞名今日親見
師云添得一場愁僧禮拜師云若是便休師
乃云萬壽門下一一作家蓋是強將之兵也
綺三
二十
然雖如此保福有言擊石火閃電光構得構
不得未免喪身失命若教據令而行盡蘇臺
一境人箇箇三頭六臂到翠峯手裏也須瓦
解冰消如今放過一著分付萬壽和尚
師到秀州百萬道者備茶筵請陞堂僧問赴

請雪竇先至嘉禾向上宗乘請師舉唱師云
鳥啼處處皆相似進云與麼則得聞於未聞
也師云不是苦心人不知僧擬進語師便喝
僧禮拜師云別有問語者出來問如何是教
外別傳一句師云三生六十劫進云學人未
會師云碧眼胡僧笑點頭師乃云山僧此者
承鄞江太守之命俾赴雪竇住持再至嘉禾
彌增嘉幸仍承百萬道者曲賜周勤仰荷之
懷無以忘也兼勞廣命碩德抑令舉唱宗乘
況達士相逢非存目擊若云言中有響句裏

呈機猶曲爲中下之流向本分衲僧遠之遠矣祇如適來僧問教外別傳一句對云二生六十劫諸人還知落處也無且鷺池鷺嶺海甸菴園三百法會之中甚處有者箇消息所以道三世諸佛不能自宣一代時教詮注不及除非知有莫能知之久立衆慈伏惟珍重綱三 廿一師到靈隱衆請陞座僧問遠別翠峯文室將屆雪竇道場如何是不動尊師云看風使帆進云恁麼則觀方知彼去去者不至方師云龍頭蛇尾問如何是祖師西來意師云點進

云猶有者箇在師云三十年後進云與麼則翠峯今日瓦解冰消師云有些子師乃云莫是與上座相爭然則論戰也箇箇力在箭鋒相拄又須是箇特達漢始得若意根尚滯直須向前決擇所以長沙和尚道百尺竿頭坐底人雖然得入未爲真百尺竿頭須進步十方世界是全身僧舉問南泉百尺竿頭如何進步泉云更進一步僧復問瓦官官云百尺竿頭用進作什麼僧不肯官便打師云大衆古人機變出在一時其間別有商量亦未言

著且如雪竇今日再入靈隱也似百尺竿頭
依南泉之言得進一步喜與大眾相見則十
方世界一時周匝便下座

師到越州承天寺衆請陞座僧問學人不問
西來意藏身北斗意如何師云拈頭作尾漢
進云請師答話師云西天令嚴問有問有答
賓主歷然無問無答時如何師云古路草漫
漫進云若不上來焉知與麼師云利劍不斬
死漢師乃云作者相見一撈一捺撩起便行
若佇思停機卒摸捺不著若言問在答處答

在問宗箇箇依草附木問不在答處答不在
問宗罕見頂上有眼諸人還薦得也無薦得
薦不得並是新雪竇之過且莫鈍致承天和
尚

越州檀越備茶筵請師陞座僧問檀越殷勤

詩三

廿二

伸三請乞師方便指迷津師云不許夜行投
明須到進云非但學人四衆有賴師云百千
年後問如何是祖師西來意師云迢迢十萬
餘僧禮拜師云拄杖不在師乃云諸檀信山
僧暫以經過邂逅相遇何沐特隆異待抑俾

敷揚且如承天和尚寅暮流慈諸人況是異聞已絕希異何必更煩雪竇重爲發宣直饒三世聖人六代關士利生間出故不敢錯誤諸人絲毫然雖與麼放過即不可良久云不解作客勞煩主人

師歸寺上堂有僧問如何是雪竇正主師云何不問雪竇山人進云與麼則把定乾坤去也師云出門唯恐不先到當路有誰長待來問如何是古佛家風師云青天白日進云還許學人領會也無師云不是劔客請莫相

過問如何是第一句師云袖裏金槌僧便喝師云朝三千暮八百問如何是雪竇境師云天無四壁進云如何是境中人師云月在中峯進云與麼則從苗辯地因語識人師云是僧禮拜師云酌海持蠡一場困苦師乃云甚

身三

廿三

生標格還知也無諸禪德祖佛不能宣傳天地不能覆載二乘聞之膽裂十地到此竄驚其或達士切磋頗逢決戰一撥一捺略露風規句滯則嶽立磨空源迷則雲橫布野所以先聖道一言纔舉千車同轍該括微塵猶是

化門之說你衲僧合作麼生覲自知時便下座

上堂僧問承師有言三更過鐵門意旨如何師云忠言不避截舌僧禮拜師云臨筌方覺取魚難問千山萬水穿雲去撥草瞻風事若何師云蹋破草鞋進云爲什麼如此師云人無遠慮必有近憂問如何是向去底人師云伊蘭樹下坐進云却來時如何師云白日繞須彌進云天上天下唯我獨尊師云二頭三手漢問承師有言釋迦老子出氣不得甚處

諸訛師云君子千里同風進云與麼則殃及子孫也師云素非鴨類師乃云諸禪德直饒文殊辯說認螢火爲太陽居士杜詞指魚目同明月所以雪竇尋常道威音王已前無師自悟是第二句還我第一句來若未能把定要津不免奔馳南北

上堂因僧送拄杖上師師拈起成頌云清峻孤根別有靈勢含山水自分明提來勝得豐城劒報盡人間兩不平復云大凡以平報不平是義烈常準以不平報不平爲格外清規

亦猶以智遣惑頗逢下士以智遣智罕遇作
家要會兩不平麼諸人也沒量罪過雪竇也
沒量罪過雪竇過自能檢責你者漆桶不打
更待幾時以拄杖一時趲下

冬至上堂僧問鼓聲纔罷海衆齊臻新節一

詩三

廿四

句請師垂示師云三日前五日後進云與麼
則聞於未聞師云索短不構深泉問文殊仗
劍其意如何師云八十老僧閑灌頂進云學
人不會師云四溟無浪月輪孤僧良久師喝
云甚處去也僧禮拜師云放過一著師乃云

相逢不拈出舉意便知有早是不唧溜漢更
亂蹋步向前實謂苦屈諸禪德看他先覺未
離兜率已降閻浮未出母胎度人已訖若言
周行七步目顧四方天地之間唯我獨尊尚
有人不放伊過如今巧說異端不肯荷負真
可哀愍所以道天魔外道是辜恩德漢聲聞
二乘是自欺誑人你見如此不平之事便合
憤悻驅將去喝將去隨例道我不知不會者
般底苦海裏有什麼出頭時
上堂云形與未質名起未名形名既兆遊氣

亂清師拈起拄杖云大衆拄杖子是形名雙
舉還有過也無有即水裏月無即形名兆若
也究得實謂恩大難酬

上堂云未出母胎見成公案周行七步過犯
彌天更入鹿野苑中枝蔓上復生枝蔓乃拈

尚三

什五

起拄杖云吽吽便下座

上堂僧問如何是觸目菩提師云風動塵起
鳥飛落毛進云乞師再垂方便師云泊被打
破蔡州問如何是教外別傳一句師云好問
進云還許學人領會也無師云有頭無尾漢

師乃云諸仁者夫宗師唱道譬若滄溟上客
獨泛蘭舟月渚煙波隨情放曠欲拋香餌須
待長鯨縱有纖鱗應無希冀

上堂云一徑直二周遮衲子辯得眼裏生華
便下座

上堂僧問達磨西來單傳心印諸方爲什麼
各說異端師云誰進云爭柰即今何師云西
天令嚴進云與麼則入水見長人師云韓信
臨朝底問三通鼓罷羣賢集請師拋下御前
題師云長因送人處憶得別家時進云與麼

則退身三步師云依舊漁翁把釣竿問不除妄想不求真底是什麼人師云一宿覺進云與麼則天上天下唯我獨尊師云一撥便轉師乃云大凡出衆切磋也須是本分禪客若未具啐啄同時眼卒摸捺不著

上堂衆方集定師云不用低頭思量難得使下座

上堂云直釣釣鯢鯨曲釣釣龜鼈曲釣若在鯢鯨理應未可直釣若在龜鼈情亦不甘如今拋釣也負命者上鉤來良久云勞而無功

便下座

上堂衆集定師起立云雪竇得與麼長諸人得與麼短若人道得齊肩句許伊把定乾坤便下座

上堂云久雨不晴衲僧向甚處曬眼皮草便

綺三

廿六

下座

上堂云布袋裏盛錐子不出頭是好手復云大衆雪竇錐頭出也莫有傍不肖底禪客出來良久云諸人既乃縮頭且聽諸方檢責明覺禪師語錄卷第一

音釋

剡鳥歡切 楮先結切 鞞步拜切 誓先奚切 櫬
初觀切 近 羶音零與 禪音早 慇蘇到切 顛顛頂
身衣也 與 麤音胡切 鼯音分 蚤音離 顛顛頂
顛許安切 狛與麤同 鼯音分 蚤音離 顛顛頂

永樂北藏

明覺禪師語錄

第一五五冊

永樂北藏

明覺禪師語錄

第一五五冊

明覺禪師語錄卷第二

門人 一 軫 等 編 綺四

舉古

舉僧問趙州道人相見時如何州云呈漆器
師云諸禪德還有識趙州底麼出來相共商
量若未能辯明太奸從頭舉與你點破四九
三十六收

舉臨濟示衆云有一無位真人常在汝等面
門出入初心未證據者看看時有僧問如何
是無位真人臨濟下禪牀擒住者僧擬議濟

托開云無位真人是什麼乾屎橛雪峯聞云
臨濟大似箇白拈賊師云夫善竊者神鬼莫
知既被雪峯覷破臨濟不是好手復召大衆
雪竇今日換你諸人眼睛了也你若不信各
歸寮舍自摸捺看

舉僧侍立保福次福云你得與麼麤心福拈
一塊土與僧你拋向門外著僧拋了却來云
甚處是某甲麤心福云我見你築著磕著所
以道你麤心師云然則者僧被保福熱瞞爭
茶真不掩偽曲不藏直雪竇將今視古於理

不甘是你者一隊漢忽僧堂裏來寮舍內出
築著磕著亦乃不知近來麤心轉盛我若放
過便見諸方檢責師薦拈拄杖下座大眾一
時走散

舉雪峯敲觀和尚門觀云誰峯云鳳凰兒觀
云作什麼峯云鷗老觀觀便開門雪峯方入
被觀把住云道道峯擬議被觀推出峯住後
示衆云我當時若入得老觀門你者一隊噇
酒糟漢向甚處摸捺有老宿云雪峯徒有此
語當時入不得如今也入不得師云者辜恩

負德漢有什麼交涉當時入不得豈是教你
入今既摸捺不著累他雪峯俱在老觀門下
舉臨濟侍立德山山云今日因際云者老漢
竊語作什麼山便打際掀倒繩牀山便休師
云二員作者具啐啄同時眼有啐啄同時用
雪竇擬向猛虎口中奪鹿餓鷹爪下分兔敢
謂臨濟德山二俱瞎漢有人辯得天下橫行
舉乾峯和尚云舉一不得舉二放過一著落
在第二雲門出衆云昨日有人從天台來却
往南嶽去峯下座云大眾來日不要普請師

第四

二

云看他作者吐露箇消息宛爾不同若是瞋睡漢遞相鈍致乃拈起拄杖云放過一著便下座

舉玄沙云吾有正法眼藏付囑摩訶大迦葉猶如話月曹谿豎拂猶如指月鼓山云月咏玄沙云者阿師就我覓月鼓山不肯却歸衆云道我就他覓月師云玄沙鼓山如排百萬軍人陣只拋瓦子相擊或有衲僧辯得當知正法眼藏付囑有在

舉長慶云淨潔打疊了也却近前就我覓我

劈脊與你一棒有一棒到你你須生慚愧無一棒到你你又向什麼處會師云雪竇即不然淨潔打疊了也直須近前我劈脊與你一棒有一棒到你你即受屈無一棒到你與你平出但與麼會

詩四

三

勘辯

一日侍者報有三人新到從瑞巖來師云教伊大展坐具禮拜著其僧方入門師驀拈起拄杖僧云某甲特來禮拜和尚師云吽吽那箇是叅頭一僧近前問訊師云你爲什麼失

却本道公驗僧云深領和尚慈悲師云過者
邊立復問第二人求朋須勝已似我不如無
師以拄杖指叅頭云你爲什麼隨者漆桶僧
云某甲新戒師亦約云過者邊立又問第三
人適來兩箇敗闕了也你堪作箇什麼僧擬
議師便喝云過者邊乃云據合一時埋却且
念遠來叅堂去

問新到尋師訪道翫水遊山僧云謝和尚顧
問師便喝鼻孔裏祇對我僧無對師云苦殺
人來來曾到雪竇麼僧云不曾到師打一棒

云他後不得諱却

一日二人新到師云座主衲僧僧云請和尚
鑑師云一不成二不是僧云不勞如此師云
我且放過朝到西天暮歸東土作麼生僧無
對師云杜衲僧叅堂去

問新到近離甚處僧云和尚道什麼師云我
問你近離甚處僧退身立師云克由叵耐不
言來處將拄杖來僧云某甲近離奉川師云
打野樵漢何不早與麼道復問第二人你也
一處來僧云某甲近離大梅師云兩段不同

好與三十棒且放過

一日宗首座到方擬人事師約住云既知信之韜略便須拱手歸降宗云今日敗闕師云劒刃未施賊身已露宗云氣急殺人師云敗將不斬宗云是師云禮拜著宗云三十年後

將四

四

有人舉在師云已放你過

問聰道者久叅事作麼生道者云青天白日師云亂走作什麼者便喝師云喫棒者擬舉手師打一坐具云你看者瞎漢亂與

一日五人新到師云你總不消行脚僧擬議

師云一狀領過

有良周上座到師作瞌睡勢僧云新到相看師不應僧又云新到相看師高聲云阿誰僧云新到師云已知叅堂去僧云某甲是大龍受業師喝云漆桶誰識你僧便近前人事師云好好禮拜著相看了師云還識宗首座麼僧云是師兄師云你爲什麼鈍致他僧云和尚休得也師云踏破草鞋漢不能打得你且坐喫茶

問僧近離甚處僧云天台師云還見智者麼

僧云見師云爲什麼在我脚底僧無語師云
脫空妄語

問僧近離甚處僧云温州師云還識永嘉大
師麼僧云是鄉人師云與你隔海僧云酌然
師云面赤不如語直僧無對師云噓

紉四

五

師在大龍爲知客李殿院到山茶話次問師
知客是長老鄉人師云不敢院云且在者裏
不得亂走師云本爲行脚院云行脚爲甚事
師云看亂走底院微笑

師在池州景德爲首座時太守曾學士入院

相訪茶果次學士拈箇棗子拋在地上召師
首座師應諾士云古人道不離當處常湛然
在那裏師指景德長老云只者老子也不知
落處士云首座知也不得無過師云明眼人
難瞞

師到太湖有余巡檢請師并志依上座齋臨
起檢問卑官今日命二衲僧齋得何果報師
云圖他一粒米失却半年糧依云臨行方覺
主人寬師召舍人舍人擡頭師指依云槩根
衲子齋他有甚益巡檢大笑師便起去

師赴雪竇經過杭州徐轉運問師雪竇名山多有具眼底袖僧忽相靠來長老作麼生支遣他師高聲召客司司近前師云運使問箇什麼使云推過來師云推過又爭得使無語師云彼此沒便宜使又問長老幾日渡錢塘

江師云山僧未敢前去使云作箇什麼師云徐轉運把斷要津使云今日被長老揉我上師便辭退

師在南嶽福嚴爲藏主本寺殿院同雅長老入藏院師出接殿院云藏主那師云不敢院云

藏中說著下官麼師云目前可驗院云驗底事作麼生師云不消一剎院無語師云且請殿院歸寮喫茶坐次山嵐忽起雅云殿院遊山恰阻煙霧院云靈峯聖跡爲什麼却有者箇師云下方無院擬道雅云藏主壯觀福嚴

約四

六

師云和尚且莫開眼院云作家作家師云殿院尊重時有道士秀才到院又問三教中那教最尊師乃起側身而立院云有口何不道師云對夫子難言院云休休便起師云適來造次

師在舒州海會時因看胥通判問山中多少衆師云一百來僧胥云既是海會爲甚只有百僧師云人貧智短胥云更道師云他後有人舉在又問山中長老每日說箇什麼師云路逢劍客胥云吽師便辭退

師在明州看曾學士坐次士問曾與清長老商量趙州勘破婆子話端的有勘破處麼師云清長老道箇甚麼士云又與麼去也師云清長老且放過一著學士還知天下衲僧出者婆子纔積不得麼士云者裏別有箇道處

趙州若不勘破婆子一生受屈師云勘破了也

師與僧衆入城緣化學士先有公文止絕僧道投刺師亦同例乃有頌寄士云碧落煙凝雪乍晴住山情緒寄重城使君道在未相見

詩四

七

空戀甘棠影裏行學士回答云勞勞世務逐浮沈一性澄明亘古今目擊道存無阻隔何須見面始知心復令人請師相見了士云道存無阻因甚入來不得師云他後見別處長老學士不請舉向伊士云舉著又何妨師云

山僧罪過士云好好師云諾諾

學士解印後師送到越州住數日乃辭士堅留師云歸山住持不忘學士此日士云衲僧家愛把不定師云爭得到者裏士無語師云已沐學士放辭士云容出城相送師便退士至客亭排果子茶湯了師問學士自此一別甚處再得相見士云長老何以對面忘却師云微僧心亦足矣時廣慧和尚復問師自此一別甚處與學士再得相見師云直是千里萬里於是取別士云善爲道路師云諾諾

哥頌

贈天衣長老

天衣長老無價之寶金烏東昇是何杲杲他年或要兒孫無端須入荒草

寄妙果政長老

青叟機宜太孤絕冷澹情懷止金鐵游歷不知參訪誰曾道天無第二月近聞鎖斷奔馳問何物拈來固其本飛騰直上三十三見不見芳爲君困中巖藏晦亦枯槁年光休競七十九南北東西追古風時有其人繼其後

送宗侍者

深憶韶陽示奇句昔人到此猶不住宗禪九
萬曾列程吾想七閩還獨步重巖忽爾來扣
門自謂孤蹤若斷雲雪庭乍遠雖多恨且有
中峯月共分斯句乃宗禪者
離山日有作如斯慷慨非希
冀浩浩清風無處避天上天下知不知五葉

千燈復何啻

小谿贈溥禪者

歲月將闌天光普寒鄙叟復枕盤桓且難萬
杉禪客來尋我言意勤勤勉清墮拂曙片帆

重率歸百節四肢難負荷風之泠泠潮之平
平強寫離辭幾不成巖層落落舊知己相見
無忘極此情

送清禪者

有禪者号曠發靈機出洪都号聲先步隨一
文一技不爲用方內方外誰論之春風來号
何所別何曾拂盡古巖雪極目寥寥思遠人
曹谿堪共此時節清号清苦宜存歷亮号辜
馬休同跡彈指凋殘六葉華西山一去斷消
息

送一禪者

天得一地得一王得一兮無等匹谷得一兮
歸巨溟應見三山皆岌岌一得一又何必今
古不曾居丈室千華影裏復是誰八面風清
照紅日一禪一禪須記取象骨齡難兮且相
許負石投針忽載來拂袖雙雙便回去

詩四

九

送全禪者

有龍彪兮時之相宜有藝行兮人之所歸東
西武步兮復誰是我上下觀方兮存機未機
全禪全禪知不知大施門開兮塵區可依

送靜山水

松根石上曾唯我四顧寥寥誰未可豈知白
鳳傳好音拋却亂雲千萬朵谿山重疊春將
暮風遞殘華柳飛絮金盃待月應有期寶冠
照水寧無據靜禪復記吾深囑彼兮國士真
烈宿相見從容莫等閑人天景行存高躅

寄藏主收禪者

新州出箇賣樵者龍朔年中藏晝夜黃梅春
得古菱華不倚物兮便高挂秀禪拂拭無塵
埃歷盡諸難眼未開交馳石上求文字爭得

永樂北藏

明覺禪師語錄

第一五五冊

孤峯却截來近還有箇尋吾祖云在盧村深
處住偷得隣家些子光用作千燈擬流布呵
呵呵地久天長爭奈何

送雲禪德

中巖老号八十一閑寄十年助辭筆縱誇步

驟當此時豈免龍鍾笑他日他時誰也流機
變午夜寒蟾生水而別有清光何處來舉目
亂飛星斗轉歌兮歌兮苦搜索遠贈雲禪愧
標格黃梅席上追古風高唱自知天地窄
贈陸學士

古之陸大夫多集遊方輩今之陸使君復與
空生會大國正搜羅長劒今磨淬或問清曠
閑不知若爲對

舟行

孤舟選勝傍江干乘興幽游思未闌向日望

詩四

來春色晚順潮歸去野情寬高歌釣客收綸
線弄影沙禽刷羽翰迴想古祠無限意海蟾
初上逼人寒

東軒偶作

叢竹小山些子境偶來閑坐解疎慵怡然縱

目誰知我勝入摩雲千萬峯

明覺禪師後錄

上堂云日日日東上日日日西沒循環三百六十幾箇解知窠窟放開精精冥冥把定恍恍惚惚君不見毗耶離城彼上人一室寥寥是何物師召大眾云高著眼便下座

上堂云黃金爲地白銀爲壁釋迦老子不合向者裏肩師以拄杖撥一下云看看落爾諸人頭上

上堂云三千劍客今何在獨許莊周致太平

便下座

一日云大眾者一片田地分付來多時也爾諸人四至界畔猶未識在若要中心一樹子我也不惜良久云放憨作麼便下座

因雪示衆云頭上皚皚脚下皚皚金色尊者

詩四

獨上高臺開眼造罪合眼受災如何如何天網恢恢

十一

上堂衆方集定師云勘破了也便下座

上堂拈起拄杖云物中眼眼中物十方如來同此超出還會麼瞎漢歸堂

上堂云龍泉與刀斧同鐵利鈍懸殊駑駘與驥馬同途遲速有異酌然酌然一出入半合半開平展之流試辯緇素

上堂云直得動地雨華何如歸堂向火便下座

師一日晚叅於僧堂前立云不打鼓上去不得把却門入來不得速道速道大衆眼目定動師以拄杖一時打趂

上堂舉雲門大師云禪河隨浪靜山河大地不是浪師拈起拄杖云看看一處起千處百

處沒背一處息千處百處不識還會麼歸堂上堂云見一則瞎汝眼知一則翳汝眼翳生則天上人間瞎却則三頭六臂或若辯得許爾十字縱橫

上堂云以字不成八字不是優曇華正開巖著無香氣翻笑釣魚船上客不愛南山愛鼈鼻僧問萬里無雲伸一問青天喫棒意如何師云軍隨印轉僧云恁麼則在和尚手裏師云利劍不斬死漢

上堂云春山疊亂青春水漾虛碧寥寥天地

間獨立望何極便下座却顧謂侍者云適來有人看方丈麼云有師云作賊人心虛

上堂云大無外小無內半合半開成團成塊老胡既隔絕衲子多違背從他千古萬古長漫漫填溝塞壑没人會以拄杖卓地一下云

均四

十二

歸堂

一日上堂衆方集以拄杖橫按膝上云恁麼會得瞎却天下人眼復拋下拄杖云救取一半便下座

上堂云十方無壁落四面亦無門淨裸裸赤

俊俊沒可把灌溪老出頭不得且致我騎牛入爾鼻孔裏一般漢聞人恁麼道若風過樹頭有什麼共語處

上堂云一不定二不可上下四維春風包裹桃華杏華闌開柳條桑條慙破可憐昔日靈雲剛道迷逢達磨師拈起拄杖云靈雲鼻孔穿了也

上堂云垂絲千尺意在深潭離鈎三寸釣得一箇是好手良久云負命者上鈎來

一日小叅示衆云須菩提巖中宴坐諸天雨

華讚歎尊者云空中雨華讚歎復是何人云
我是梵天尊者云汝云何讚歎天云我重尊
者善說般若波羅蜜多尊者云我於般若未
曾說一字汝云何讚歎天云尊者無說我乃
無聞無說無聞是真說般若波羅蜜多又復
動地雨華師云避喧求靜處世未有其方他
在巖中宴坐也被者一隊漢塗糊伊更有者
老把不住問云空中雨華讚歎復是何人早
見敗闕了也我重尊者善說般若波羅蜜多
惡水驀頭潑我於般若未曾說一字草裏走

詩四

十三

尊者無說我乃無聞識甚麼好惡總似者般
底何處有今日師復召大眾雪竇幸是無事
人爾來者裏覓箇甚麼以拄杖一時趂下
上堂舉僧問趙州至道無難唯嫌揀擇是時
人窠窟否州云曾有人問我直得五年分踈
不下師云識語不能轉死却了也好與二十
棒者棒須有分付處爾若辯不出且放此話
大行
示衆云春力不到處枯樹亦生華九年人不
識幾度過流沙便下座

有時云馬祖陞堂百丈捲簾正令不從拗曲
爲直

上堂云似地擎山不知山之孤峻如石含玉
不知王之無瑕晝行三千夜行八百是我尋
常用底拈放一邊爾諸人向甚處見盤山速
道速道

上堂舉僧問趙州二龍爭珠誰是得者州云
老僧只管看師云看即不無爭即不得且道
扶者僧扶趙州

上堂云不是金色頭陀有理也無雪處便下

座

一日示衆云城東老母與佛同時而生一世
共處而不欲見佛每見佛來即便迴避周迴
上下皆避不及乃以手掩面十指掌中悉皆
見佛諸上座他雖是箇老婆宛有丈夫之作
既知迴避稍難不免吞聲飲氣如今不欲見
佛即許爾切忌以手掩面何以明眼底觀著
將謂雪竇門下教爾學老婆禪
舉黃檗入堂於南泉位中坐泉問長老甚年
中行道檗云威音王已前泉云猶是王老師

兒孫下去壁便起去師云可惜王老師只見
錐頭利我當時若作南泉待伊道威音王已
前即便於第二位坐令黃檗一生起不得雖
然如此也須救取南泉

舉藥山久不上堂知事白云大眾久思和尚
示誨山云教槌鍾著大眾方集山便掩却門
知事咨白既許爲大眾上堂爲什麼一言不
施山云經有經師論有論師爭怪得老僧師
云可惜藥山老漢平地上喫撲盡大地人扶
不起

舉石鞏曾爲獵人趣一鹿從馬大師菴前過
問云還見我鹿麼大師云爾是甚人鞏云我
是獵人馬云爾還解射也無云解射馬云一
箭射幾箇云一箭射一箇馬云爾不解射鞏
云和尚莫解射否云我解射鞏云和尚一箭
射幾箇馬云我一箭射一羣鞏云彼此生命
何用射他馬云爾旣如是何不自射鞏云若
教某甲自射直是無下手處馬云者漢無明
煩惱頓歇鞏於是以刀斷其髮在菴給侍師
云馬大師一箭射一羣信彩射得有甚用處

十四

十五

不如他石鞏一箭射一箇却是好手雪竇今日効古人之作擬放一箭高聲喝云看箭復云中也便下座

舉同光帝命諸禪師坐次云朕收得中原之寶只是無人酬價興化云如何是陛下中原之寶帝以兩手展幙頭脚化云君王之寶誰敢酬價師云至尊所得只可傍觀若非興化作家徃徃高賈酬却

一日上堂良久云大施門開無擁塞忽然有箇衲子出來雪竇倒退八百何以臨危不悚

人便下座

舉保壽問胡釘鉸云莫便是胡釘鉸云不敢壽云還釘得虛空麼云請和尚打破將來壽便打鉸云莫錯打某甲壽云向後遇多口阿師與爾點破去在後至趙州舉前話問云不知某甲過在甚處趙州云只者一縫尚不奈何胡釘鉸於此有省師云雪竇要打者三箇漢第一趙州不合瞎却胡釘鉸眼第二保壽不能塞斷趙州口第三胡釘鉸放過保壽師驀拈起拄杖云更有一箇大眾一時走退師

擊繩牀一下便起去

上堂善財別後誰相訪樓閣門開竟日閑便下座

舉肅宗帝問國師百年後所須何物國師云與老僧作箇無縫塔子帝曰請師塔樣國師

詩四

十六

良久云會麼帝云不會國師云吾有付法弟子耽源却諳此事請詔問之國師遷化後帝詔耽源問此意如何源云湘之南潭之北中有黃金充一國無影樹下合冢船瑠璃殿上無知識師云肅宗不會且致耽源還會麼只

消箇請師塔樣盡西天此土諸位祖師遭者一拶不免將南作北有傍不肖底出來我要問爾那箇是無縫塔

舉雲門與長慶在雪峯日因舉石磬見僧便云看箭三平到遂擘開曾鞏云三十年一張弓兩下箭只射得半箇聖人雲門問長慶作麼生道免得石鞏喚作半箇聖人慶云若不還價爭辨真偽雲門云入水始知有長人師云石鞏要先拗折不難乎奈三平中的了也然則老宿要活三平且未免張弓架箭

上堂云一華開天下春古佛爲什麼不著便爾若透得收取天下老宿忽若有箇衲僧出來云和尚且自救也許伊是金毛獅子

舉舍利弗問須菩提夢中說六波羅蜜與覺時同別須菩提云此義幽深吾不能說此會

約四

十七

有彌勒大士汝往彼問師云當時若不放過隨後與一劄誰名彌勒誰是彌勒者便見冰消瓦解

舉傳大士云要知佛去處師云三生六十劫末後一句天下衲僧跳不出直饒口挂壁上

漢別有一竅勘過了打

舉紫湖和尚山門立一牌牌上有字云紫湖有狗上取人頭中取人腰下取人腳擬議則喪身失命時見新到便喝看狗僧纔迴首湖便歸方丈師云衆中總道者僧著一口著即著了也爭奈者僧在敢問諸人紫湖狗著者便死因甚麼者僧猶在若無知方眼救得者僧設使紫湖出世咬殺百千萬箇有其益我當時若見先斫下牌然後入院待者老漢喝云看狗與伊放出箇焦尾大蟲如今諸人要

見麼日勢稍晚歸堂

上堂云國無定亂之劍四海晏清也不是分外還有梯山入貢底麼

因中山主爲師煎茶師問僧爾隨例喫茶將何報答僧云因風吹火師不肯自代云難爲

和尚復云還會麼僧云不會師云爾也須煎

一會茶始得

舉長慶示衆云撞著道伴交肩過一生衆學事畢師云是即是針不割風不入有甚麼用處

上堂云摩竭掩室計校未成毗耶杜辭伎倆俱盡還有人點檢得者兩箇老漢出頭不得處麼直饒覷透更有箇漢礙著以拄杖擊繩牀一下便下座

有時云槌擊妙喜世界百雜碎底人爲甚麼

約四

十八

處處解持鉢

又云知時頻到香積國底人爲甚麼拄杖頭上失却眼

一日云義出豐年儉生不孝於佛法中作麼生辯損益便下座

上堂云一塵一佛國一葉一釋迦德山何以
卓牌於鬧市又云入林不動草入水不動波
投子因甚麼脚下五色索透關底試辯看
上堂云世事悠悠不如山丘卧藤蘿下塊石
枕頭者般底有甚用處喚起了打

有時云一切不是句瞎却時人眼還有出得
底麼

上堂云一切法皆是佛法瞞瞞顛顛非爲正
觀一切法即非一切法莽莽鹵鹵還同天鼓
賞箇名安箇是立箇非向甚處見釋迦老子

還會麼以拄杖卓地一下云各請歸堂

示衆云父子親其居尊卑異其位於衲僧分
上是放開是捏聚或若辯得分半院與爾

一日云寶山到也須開眼勿使茫茫空手迴
便下座

上堂云機輪轉處作者猶迷千眼頓開與君
相見

師問新到關黎甚處人僧提起坐具師云蝦
跳不出斗僧云踣跳師便打僧云更踣跳師
又打僧便走師喚迴僧便禮拜云觸忤和尚

師云我要者詰行爾又走作什麼僧云已徧
天下了也師復打五下僧云有諸方在師云
爾只管喫棒師喚第二人近前來甚處人云
鼎州人師云敗也僧云青天白日師云兩重
公案僧云恰是師以拄杖指云爾擬蹲跳僧
擬議師亦打五下叅頭云者僧喫棒與某甲
不同師一時喚近前其僧珍重便走師隨後
與一拄杖

上堂云孟嘗之門劒客何在良久云點即不
到便下座

上堂云泡幻同無礙拈起拄杖云泡幻何處
得來又擊一下云西天四七聖東土二三祖
鼻孔眼睛總穿在者裏瞋睡漢歸堂

上堂云目前無法意在目前不是目前法非
耳目之所到師拈起拄杖云夾山老子甚處
去也何不出來百草頭與大眾相見又卓地
一下云在者裏復云咄者野狐精縮頭去便
下座

僧問牛頭未見四祖時如何師云恰潒麼僧
云見後如何師云三生六十劫僧禮拜師長

吁一聲

上堂云一舉不載說作麼生舉得作麼生會上堂云久雨不晴今日晴衲僧曬了也未良久自云曬了也師云收復拈起拄杖大眾定動師云無一箇靈利便下座打趂

詩四

二十

示衆云譬若二龍爭珠有爪牙者不得或有衲僧問既是有爪牙者爲什麼不得請大衆爲雪竇下一轉語

上堂僧問承和尚有言道士倒騎牛意旨如何師云沉人眼赤僧云不會師云有甚麼了

期便下座

上堂云天得一以清地得一以寧衲僧得一無風浪起爾若辯得禍不入慎家之門

舉僧問鏡清學人啐請師啄清云還得活也無學云若不活遭人怪笑清云也是草裏漢師云衲僧有此奇特事若一人半箇互相平展古聖也不虛出來一迴問承和尚有言金剛鑄鐵券意旨如何師云三頭六臂云學人不會師云擡上擡下師拈起拄杖云人天交接兩得相見、茫茫何擾擾穿來且放一邊

三十三二十八敲落又在一處復云退後退後便起去。

問承古有言九九八十一意旨如何師云金剛合掌進云學人不曾師云敝依佛法僧

上堂云應緣而化物方便呼爲智拈起拄杖

喚作什麼爾若道不得也許具一隻眼

鈞四

廿一

上堂舉雪峯示衆云盡乾坤是箇解脫門把手拽不肯入一僧云和尚怪某甲不得一僧云用入作什麼師云三箇中有一人受教在忽若總不辯明平地上有甚數便下座

一日云此大講堂洞開東方日輪昇天則有明曜中夜黑月雲霧晦暝則復昏暗戶牖之隙則復見通牆宇之間則復觀壅分別之處則復見緣頑虛之中徧是空性鬱燁之象則紆昏塵澄霽歛氛又觀清淨慚愧釋迦老子說甚還與不還文殊堂裏萬菩薩到處覓不得元來總在者裏靈利漢一見便請拗折拄杖

上堂舉鏡清問僧近離甚處云石橋清云本分事作麼生云某甲近離石橋清云我不管

爾石橋本分事作麼生云和尚何不領話清
便打僧云某甲話在清云爾但喫棒我要話
行師云然則倚勢欺人奈緣事不孤起者僧
若能慎初護末棒則須是鏡清自喫

舉雲門大師示衆云爾若不相當且覓箇入
頭處微塵諸佛在爾舌頭上三藏聖教在爾
脚跟底不如悟去好還有人悟得麼出來對
衆道看師拈云然則養子之緣爭奈壓良爲
賤其間忽有不甘底出掀倒繩牀豈不是大
丈夫漢然雖如此且問據箇甚麼師爲拈起

拄杖云洎合停囚長智擊繩牀一下便下座
上堂云窮諸玄辯若一毫致於太虛竭世樞
機似一滴投於巨壑不如歇去好還會麼客
亭不遠

上堂云青蘿夤緣直上寒松之頂白雲淡泞

詩四

廿二

出沒太虛之中師拈起拄杖云國師眼睛在
者裏瞋睡漢七穿八穴甚處得來

一日舉乾峯示衆云舉一不得舉二放過一
著落在第二雲門大師出衆云昨日有人從
天台來却往南嶽去峯云來日不要普請師

云諸禪德雲門老漢只解一手擡不能一手
搦還有共相著力底麼試露爪牙看

上堂云不得春風華不開華開又被風吹落
爾若昧得衰敗句未必善因而招惡果歸堂
一日云古人道其爲也形其寂也冥轉變天
地自在縱橫河沙而用混沌而榮誰聞不喜
誰聞不驚如何以無價之寶隱在陰入之坑
師以拄杖擊一下云打破了也寶在甚處
有時云不犯之令大衆必合依行
上堂云萬法本閑而人自鬧國師走入露柱

裏去也見麼見麼良久云出頭便死歸堂

示衆云迴而更相涉拈起拄杖云頭上是天
脚下是地眼前綠水背靠青山衲僧道我會
也忽若騎驢入爾鼻孔裏牽牛入爾眼睛中
又作麼生商量

新四

廿三

上堂云欲得現前莫存順逆者裏叅見祖師
了更買草鞋行脚三千里外也被雪竇穿却
鼻孔

一日舉馬祖上堂衆方集百丈出捲席祖便
下座諸方皆謂奇特渭麼舉還當麼若當譬

若水母以蝦爲目若不當又空讚歎箇什
麼衆中一般漢亂踏向前問古人意旨如何
更有老底不識好惡對云將謂仙陀客又云
來日更到座前苦哉苦哉如此自稱宗匠欲
開人天眼目驢年去諸上座雪竇當時若見
伊出來捲席劈胸與一踏令坐者倒者俱起
不得且要後人別有生涯去免見互相鈍置
豈不箇箇英靈底漢還會也無歸堂
上堂云虛空爲鼓須彌爲槌打者甚多聽者
極少且問誰是解打者莫謗鹽官好只如南

泉道王老師不打者破鼓法眼去王老師不
打兩箇既不奈何一箇更是懺懺

上堂云還有關市裏出頭底麼良久云不如
策杖歸山去長嘯一聲煙霧深便下座

舉僧問趙州學人乍入叢林乞師指示州云
喫粥了也未云喫粥了也州云洗鉢盂去雲
門大師云且道有指示無指示若云有向他
道什麼若道無何得悟去師拈云我不似雲
門爲蛇畫足直言向爾道問者如蟲蝕木答
者偶爾成文然雖恁麼瞎却衲僧眼作麼生

免得此過諸仁者要會麼還爾趙州喫粥未
拈却者僧喫粥了雪竇與爾拄杖子歸堂

舉雲巖大師云盡十方世界乾坤大地天下
老和尚以拄杖一畫云百雜碎師云者老漢
是即是要且未有出身之路如今拄杖在雪

結四

廿四

竇手裏復橫按云東西南北甚處得來

舉僧問投子如何是十身調御投子下繩牀
立又問凡聖相去多少投子下繩牀立師云
此公案諸人無不委知若謂麼舉天下衲僧
盡為念話社家雪竇莫有長處也無試為大

衆舉看几聖相去多少投子下繩牀立如何
是十身調御投子下繩牀立且道與前來舉
底同別若道一般許上座具一隻眼若云別
有奇特也許上座具一隻眼復更開一線道
几聖相去多少請上座下一轉語如何是十
身調御答一轉話非但衆見投子亦乃知雪
竇長處或若總道下繩牀立惜取眉毛便下
座

舉洞山聰和尚每見新到便問瀉山水牯牛
上座作麼生會前後皆不相契師到亦乃垂

問師云後人標榜洞山擬道師以坐具拂一下便行洞山云且來上座師云未衆堂

舉雲門大師云三乘十二分教達磨西來放過即不可若不放過不消一喝師隨舉了便喝復云大衆好喝落在甚處若要鼻孔遠天辯取者一喝便下座

終四

廿五

師因事示衆云杜耳目於胎殼掩玄象於霄外而責宮商之異辯玄素之殊底是甚麼人還知落處麼那一箇者一箇兼本三人放過一著便下座

上堂云三十年來尋劍客有麼有麼幾迴葉落又抽枝衲僧眼光失却了也自從一見桃華後填溝塞壑直至如今更不疑敗軍之將以拄杖卓地一下云看便下座

舉歸宗問僧甚處去云諸方學五味禪去宗云我者裏有一味禪爲甚不學僧云如何是一味禪宗便打僧云莫打某甲會也宗云爾作麼生會僧擬開口宗又打黃檗聞舉云馬大師出八十四員善知識問著箇箇肩輓轆地只有歸宗老較些子師云以彊欺弱有甚

麼難我者裏有一味禪爲甚麼不學但向道
收待伊拈起有般無眼漢只管喫咩咩雪竇
門下誰敢便下座

上堂云胡蜂不戀舊時窠猛將不在家中死
若是箇漢聊聞舉著剔起眉毛便行

一日六人新到師問云還有作家禪客麼叅
頭云和尚道什麼師云點即不到僧擬議師
便喝僧無語師云龍頭蛇尾復問第二箇僧
指叅頭云和尚問何不祇對師與一掌僧無
語師復指云第三其僧茫然師云一狀領過

上堂僧問如何是時節因緣師云瞌睡漢僧
便喝師云詐惺惺復云譬若世界壞時大水
競作其間無量衆生或沒未沒互相悲號仰
望蒼蒼皆云相救當爾之時四禪天人一見
高聲便喝咄哉衆生我預曾報汝令頻頻上
來汝都不聽如今有甚麼救處乃拍手一下
云歸堂

塔四

廿六

上堂云乾坤之內宇宙之間中有一寶挂在
壁上達磨九年不敢正眼覷著如今衲僧要
見劈脊打

上堂僧問如何是佛師云頭鬚鬚耳卓朔學云不會師云堪笑堪悲復云不著便也不奈何爾從江南江北來笠子下爲什麼拶破洛浦徧參底

上堂云乾坤把定即不無爾作麼生是手擎日月底句又云周遊四天下道我知有須彌頂上著得幾人復云舉步已經諸佛刹是爾草鞋踏破多少

上堂云長嘴鳥芳樹不棲喃喃獨語摩斯吒滄溟不入戰戰却廻三十年後悟去提起手

云吽吽便下座

上堂舉在衆日僧問如何是佛師云四衆圍繞如何是涅槃師云雙林樹下復云便是釘嘴鐵舌漢也卒話會不及歸堂

有時豎起拄杖云洪機在掌排巨靈摩太華特四

之峯復橫按云明鏡當臺絕演若逐東西之徑又以往杖一劃云比擬張麟兔亦不遇便下座廿七

上堂云不與一法作對便是無諍三昧或是箇漢聞我舉著悉能坐斷有甚麼近處雖然

如此向後莫辜負人好便下座

上堂舉古人道明眼漢沒窠臼我且問爾各從德山臨濟下來棒喝向爾不能施語言向爾使不著我既如此汝合必然又作麼生露得箇消息令雪竇知爾是箇風不入底漢去便下座

一日三僧辭師把住云天無門地無戶亂走衲僧擬往何處僧皆無對師劈面唾云枉喫我多少粥飯便推出

示衆云摩竭正令譬若披沙揀金毗耶杜辭

頗類守株待兔設使頓開千眼未辯機關點著不來白雲萬里

舉永嘉云六般神用空不空一顆圓光色非色雲門大師拈起拄杖云是色非色師云雪竇即不然圓光一顆龍司真如神用六般和泥合水填塞人設齋且致水中拈月致將一問來

有時云袖頭打領腋下刺襟諸方一任剪裁南山起雲北山下雨衲子作麼生話會

一日上堂大衆纔集師云一任諸方貶剥便

下座

舉僧問乾峯十方薄伽梵一路涅槃門路頭在什麼處乾峯云在者裏師代僧便喝復有僧問長慶長慶云問取堂中第二座師代僧云錯復有僧問師師云墮坑落澗自代云作

詩四

廿八

賊人心虛

上堂云糞掃堆上現丈六金身遇賊則貴赤肉團上壁立千仞遇明則暗鼻孔遶天底衲僧試辯雪竇爲人眼

示衆云一法不通萬緣方透會與不會成羣

作隊築著磕著一時拈却管取乾坤獨露便下座

上堂云禪河隨浪靜定水逐波清若拄杖子是浪衲僧便七縱八橫忽乾坤大地是浪便見扶離摸壁且道放行好把定好一日云春雷已發陽鳥未啼迷身句即不問爾透出一字作麼生道

上堂云巢知風穴知雨靈利衲僧未可相許若問如何苦哉佛陀參

舉馬大師云一切語言是提婆宗以者箇爲

主雲門大師云好語只是無人問我僧便問如何是提婆宗雲門云西天九十六種爾是最下種師云赤旛被者僧奪了也便下座

一日云山河無隔礙光明處處透傳大士騎驢入爾鼻孔裏見爾諸人不惺惺却歸雙林

第四

廿九

寺去也便下座

舉僧問翠微自到和尚法席每沐上堂不蒙一法示誨意在於何微云嫌箇什麼僧復問洞山山云爭怪得老僧後有僧問法眼眼云祖師來也師云兩箇老漢被者僧穿却唯有

法眼與他同參若是雪竇門下喫棒了趕出上堂云種種幻化皆生如來圓覺師云住住三世諸佛是幻六代祖師是幻天下老和尚是幻復拈起拄杖云拄杖子是幻那箇是圓覺良久以拄杖擊繩牀一下云幻出大衆擬議師云者一隊漆桶總無孔竅以拄杖一時趁下

舉夾山問僧甚處來云湖南來山云曾到石霜麼云要路經過爭得不到山云承聞石霜有毬子話是否云和尚也須急著眼山云作

麼生是毬子云越不出云作麼生是毬杖云
勿手足山云老僧未曾與闍黎相識出去師
云雪竇親見者僧從石霜來夾山因甚麼道
不相識

舉趙州問僧甚處來云雪峯來州云雪峯近
日有何言句示徒僧云雪峯道盡大地是沙
門一隻眼爾諸人向什麼處厠州云爾若過
嶺我附箇鉢子去師云者僧既不從雪峯來
可惜趙州鉢子
舉僧問石霜三千里外遠聞石霜有箇不顧

霜云是僧云只如萬像歷然是顧不顧霜云
我道不驚衆僧云不驚衆是不與萬像合如
何是不顧霜云徧界不曾藏師拈云誰是不
顧者

示衆云世界與麼廣闊爲甚麼向雪竇手裏

約四

三十

乞命

上堂云乾坤側日月星辰一時黑東西不辯
南北不分底衲僧向甚處見雪竇

上堂僧問雪覆蘆華時如何師云點僧云恁
麼則爲祥爲瑞也師云兩重公案復成一頌

雪覆蘆華欲暮天謝家人不在魚船白牛放却無尋處空把山童贈鐵鞭

師問大龍語底默底不是非語非默底更非總是總不是拈却大用現前時人知有大龍如何龍云子有如是見解那師云這老漢今日瓦解冰消至晚龍問師那裏是老僧瓦解冰消處師云轉見不堪拂袖便出龍云巨耐巨耐師不顧後舉似福嚴雅雅云何不與他本分草料師云和尚更買草鞋行脚始得僧問只在目前爲甚麼再三不覩師云截耳

卧街云黑豆未生芽時如何師云餓驢餓馬云生芽後如何師云透水透沙

明覺禪師語錄卷第二

特四

廿二

音釋

鵠苦咸切鳥人者鵠啄物曰鵠哧人者切捫智東切積丘畏切彪補尤切也切披湄切時及輓音摸莫模切密與窯同

明覺禪師語錄卷第三

綺五

叅學小師允誠等編

拈古

師舉德山示衆云今夜不答話問話者三十棒時有僧出禮拜山便打僧云某甲話也未

納五

問山云爾是甚處人云新羅人山云未踏船舷好與三十棒法眼拈云大小德山話作兩橛圓明道大小德山龍頭蛇尾師云二老宿雖善裁長補短捨重從輕要見德山亦未可何故德山大似握閫外威權有當斷不斷不

招其亂底劒諸人要識新羅僧麼只是撞著露柱底箇瞎漢

舉雪峯一日普請自負一束藤路逢一僧峯便拋下僧方擬取峯便踏倒歸舉似長生乃云我今日踏者僧快生云和尚替者僧入涅槃堂始得峯便休去師云長生大似東家人死西家助哀也好與一踏

舉百丈再叅馬祖侍立次祖以目視禪牀角頭拂子文云即用離此用祖云爾他後開兩片皮將何爲人丈取拂子豎起祖云即此

用離此用丈挂拂子於舊處祖便喝百丈直得三日耳聾師云奇怪諸禪德如今列其派者甚多究其源者極少總道百丈於喝下大悟還端的也無然刀刀相似魚魯參差若是明眼漢瞞他一點不得只如馬祖道爾他後開兩片皮將何爲人百丈豎起拂子爲復如蟲禦木爲復啐啄同時諸人要會三日耳聾麼大治精金應無變色

舉崇壽指凳子云識得凳子周巾有餘雲門云識得凳子天地懸殊師云澤廣藏山理能

伏豹

舉永嘉大師到六祖繞禪牀三匝振錫一下卓然而立祖云夫沙門具三千威儀八萬細行大德從何方而來生大我慢師便喝乃云當時若下得者一喝免見龍頭蛇尾又再舉繞禪牀三匝振錫一下卓然而立代祖師云未到曹溪與爾三十棒了也

舉仰山指雪師子云還有過得此色者麼雲門云當時便與推倒師云只解推倒不能扶起

舉香嚴垂語云如人上樹口噉樹枝手不攀
枝脚不踏樹樹下有人問西來意不對則違
他所問若對又喪身失命當恁時作麼生即
是有虎頭上座云上樹即不問未上樹請和
尚道嚴呵呵大笑師云樹上道即易樹下道
即難老僧上樹也致將一問來
舉僧問魯祖如何是不言言祖云爾口在什
麼處僧云某甲無口祖云將什麼喫飯僧無
語師云好劈脊便棒者般漢開口了合不得
合口了開不得

舉僧問雪峯古澗寒泉時如何峯云瞪目不
見底僧云飲者如何峯云不從口入僧舉到
趙州州云不可從鼻孔裏入僧却問趙州古
澗寒泉時如何州云苦云飲者如何州云死
雪峯聞舉云趙州古佛從此不答話師云衆
中總道雪峯不出者僧問頭所以趙州不肯
如斯話會深屈古人雪竇即不然斬釘截鐵
本分宗師就下平高難爲作者
舉僧問西堂和尚有問有答賓主歷然無問
無答時如何堂云怕爛却去那僧問長慶有

問有答賓主歷然無問無答時如何慶云相逢盡道休官去林下何曾見一人師云何不與本分草料

舉臨濟示衆云我於先師處三度喫六十棒如蒿枝子拂相似如今思一頓棒喫誰爲下

手僧出衆云某甲下手濟拈棒與僧僧擬接便打師云臨濟放處較危收來太速

舉欽山一日上堂豎起拳又開云開卽爲掌五指叅差復握云如今爲拳必無高下還有商量也無一僧出衆豎起拳山云爾只是箇

無開合漢師云雪竇卽不然乃豎起拳云握則爲拳有高有下復開云開則成掌無黨無偏且道放開爲人好把定爲人好開也造車握也合轍若謂閉門造車出門合轍我也知爾向鬼窟裏作活計

舉僧問睦州高揖釋迦不拜彌勒時如何州云昨日有人問趕出了也僧云和尚恐某甲不實州云拄杖不在荇蓆柄聊與三十師云睦州只有受壁之心且無割城之意舉棗樹問僧近離甚處云漢國樹云天子還

重佛法也無僧云苦哉賴值問著某甲問著別人即禍生云作箇什麼僧云人尚不見有何佛法可重云關黎受戒多少時僧云二十夏云大好不見有人便打師云者僧棒即喫要且去不再來棗樹令雖行爭奈無風起浪舉趙州問婆子什麼處去云偷趙州^四筭去州云忽遇趙州又作麼生婆子便掌州便休去師云好掌更下兩掌也無勘處舉保壽開堂日三聖推出一僧壽便打聖云渭麼爲人瞎却鎮州一城人眼去在壽便歸

方丈師云保壽三聖雖發明臨濟正法眼藏要且只解無佛處稱尊當時者僧若是箇漢纔被推出便掀倒禪牀直饒保壽全機也較三千里

舉無業馬祖僧問如何是佛云莫妄想師云塞却鼻孔又問如何是佛云即心是佛師云拄却舌頭

舉僧問德山從上諸聖什麼處去山云作麼作麼僧云勅點飛龍馬跛鼈出頭來山便休去至來日山浴出其僧過茶與德山山撫僧

背一下僧云者老漢方始瞥地師云然精金百煉須要本分鉗鎚德山既以已方人者僧還同受屈以拄杖一劃云適來公案且致從上諸聖什麼處去大衆擬議師一時打趲

舉保福簽瓜次太原孚上座到來福云道得

倚五

五

與爾瓜喫乎云把將來福度一片瓜與孚孚接得便去師云雖是死蛇解弄也活誰是好手者試請辯看

舉南泉示衆云道非物外物外非道趙州出問如何是物外道泉便打州云和尚莫打某

甲向後錯打人去在泉云龍蛇易辯衲子難瞞師云趙州如龍無角似蛇有足當時不管盡法無民直須喫棒了趲出

舉洞山到雲門門問近離甚處山云查渡云夏在甚處山云湖南報慈云甚時離山云去年八月門云放爾三頓棒山至來日却上問訊昨日蒙和尚放三頓棒不知過在什麼處門云飯袋子江西湖南便湓麼去山於此大悟師云雲門氣宇如王撈著便冰消瓦解當時若據令而行子孫也未到斷絕

舉一僧叅馬大師師畫一圓相云入也打不入也打僧便入師便打僧云和尚打某甲不得大師靠却拄杖休去師云二俱不了和尚打某甲不得靠却拄杖擬議不來劈脊便打舉興化問克賓維那不久爲唱道之首賓云不入者保杜化云會來不入不會不入賓云沒交涉化便打乃云克賓維那法戰不勝罰錢五貫充設饋飯至來日齋時興化自白槌云克賓維那法戰不勝不得喫飯即便趕出師云克賓要承嗣興化罰錢出院且致却須

索取者一頓棒始得且問諸人棒既喫了作麼生索雪竇要斷不平之事今夜與克賓維那雪屈以拄杖一時打散

舉僧問長慶衆手淘金誰是得者慶云有伎第五倆者得僧云學人還得也無慶云大遠在師

代者僧當時便喝復云有伎倆者得一手分六付有伎倆者不得兩手分付學人還得也無

蒼天蒼天

舉大慈示衆云山僧不解答話只是識病時有僧出大慈便歸方丈師云大凡扶豎宗乘

須辯箇得失且大慈識病不答話時有僧出便歸方丈雪竇識病不答話或有僧出劈脊便打諸方識病不答話有僧出必然別有長處敢有一箇動著大唐天子只三人

舉趙州到黃檗檗見來便闕却方丈州云救火救火黃檗便出擒住云道道州云賊過後張弓師云直是好笑笑須三十年忽有箇衲僧問雪竇笑箇什麼笑賊過後張弓
舉僧問鏡清學人未達其源乞師方便清云是什麼源云其源清云若是其源爭受方便

師云死水裏浸却有什麼用處侍者問適來成褫伊清云無侍者云不成褫伊清云無侍者云和尚尊意如何清云一點水墨兩處成龍師云猶較些子雪竇不是減鏡清感光要與者僧相見是什麼源其源二十年後與爾

結五

七

三十棒

舉僧問香林如何是衲衣下事林云臘月火燒山師云臘月燒山萬種千般翹松鶴冷踏雪人寒達磨不會大難大難
舉本仁和尚示衆云尋常不欲向聲前句後

鼓弄人家男女何故且聲不是聲色不是色
時有僧問如何是聲不是聲仁云喚作色得
麼云如何是色不是色仁云喚作聲得麼僧
禮拜仁云且道爲汝說答汝話若人辯得有
箇入處師云本仁也甚奇怪要且貪觀天上
既非聲前句後且作麼生入
舉雲門示衆云老胡生下一手指天一手指
地周行七步目顧四方天上天下唯我獨尊
當時若見一棒打殺與狗喫却貴圖天下太
平師云便與掀倒禪牀

舉國師三喚侍者點即不到侍者三應到即
不點將謂吾辜負汝誰知汝辜負吾瞞雪竇
不得雲門道作麼生是國師辜負侍者處會
得也是無端師云元來不會作麼生是侍者
辜負國師粉骨碎身未報得師云無端無端
復舉僧問投子國師三喚侍者意旨如何投
子云抑逼人作麼師云垛根漢僧問興化化
云一盲引衆盲師云端的瞎僧問玄沙沙云
侍者却會師云傳囚長智僧問趙州州云如
人暗中書字字雖不成文彩已彰師便喝僧

問雪竇雪竇便打也要諸方點檢乃成頌云
師資會遇意非輕無事相將草裏行負汝負
吾人莫問任從天下競頭爭

舉僧問智門和尚如何是佛云踏破草鞋赤
脚走僧云如何是佛向上事云拄杖頭上挑

詩五

日月師云千兵易得一將難求

舉師祖問南泉摩尼珠人不識如來藏裏親
收得如何是如來藏云王老師與爾往來者
是藏師云草裏漢祖云不往不來者云亦是
藏師云雪上加霜祖云如何是珠師云嶮百

尺竿頭作伎倆不是好手者裏著得箇眼賓
主互換便能深入虎穴或不涓麼縱饒師祖
悟去也是龍頭蛇尾漢

舉僧禮拜雪峯峯打五棒僧云某甲有什麼
過峯又打五棒師云雪竇不曾與人葛藤前
五棒日照天臨後五棒雲騰致雨爾若辯得
也好與五棒

舉馬大師令智藏馳書上徑山山接書開見
一圓相於中下一點國師聞舉云欽師猶被
馬師惑師云徑山被惑且致若將呈似國師

別作箇什麼伎倆免被惑去有老宿云當時坐却便休亦有道但與劃破若與麼只是不識著敢謂天下老師各具金剛眼睛廣作神通變化還免得麼雪竇見處也要諸人共知只者馬師當時畫出早自惑了也

詩五

九

舉鏡清問僧趙州喫茶去爾作麼生會僧便出去清云邯鄲學步師云者僧不是邯鄲人爲什麼學唐步若辯得出與爾茶喫

舉僧問雲門如何是法身向上事云向上與爾道即不難作麼生會法身僧云請和尚鑑

云鑑即且致作麼生會法身僧云與麼與麼云者箇是長連牀上學得底我且問爾法身還喫飯麼僧無語師云將成九仞之山不進一簣之土過在什麼處

舉趙州訪茱萸纔上法堂茱萸云看箭州亦云看箭茱萸云過州云中師云二俱作家蓋是茱萸趙州二俱不作家箭鋒不相拄直饒齊發齊中也只是箇射梁漢

舉臨濟與普化去施主家齋濟問毛吞巨海芥納須彌爲復是神通妙用爲復法爾如然

化踢倒飯牀濟云太麤生化云者裏是甚所在說麤說細濟休去至來日又同赴一施主齋濟復問今日供養何似昨日化又踢倒飯牀濟云太麤生化云瞎漢佛法說什麼麤細濟吐舌師云兩箇老賊喫飯也不了好與二

十棒棒雖行且那箇是正賊

舉三角示衆云若論此事眨上眉毛早是蹉過麻谷出云蹉過即不問如何是此事角云蹉過谷便掀倒禪牀三角便打師云兩箇有頭無尾漢眉毛未曾眨上說什麼此事蹉過

有僧問眉毛爲什麼不眨上師便打舉睦州喚僧大德僧迴首州云擔版漢師云睦州只具一隻眼何故者僧喚既迴頭因甚却成擔版

舉巖頭叅德山跨門便問是凡是聖德山便

筠五

十

喝巖頭便禮拜洞山聞舉云若不是齋公大難承當巖頭云洞山老漢不識好惡我當時一手擡一手搦師云然則德山門下草偃風行要且不能塞斷人口當時纔禮拜劈脊便打非唯勦絕洞山亦乃把定齋老還會麼李

將軍有嘉聲在不得封侯也是閑

舉巴陵示衆祖師道不是風動不是旛動既不是旛風向什麼處著有人與祖師作主出來與巴陵相見師云雪竇道風動旛動既是風旛向甚處著有人與巴陵作主亦出來與

雪竇相見

舉則川與龐居士摘茶次士云法界不容身師還見我麼川云若不是老師洎與龐公答話士云有問有答蓋是尋常川不管士云適來莫怪相借問麼川亦不管士喝云者無禮

永樂北藏

明覺禪師語錄

儀漢待我一一舉似明眼人去在川拈茶籃便歸師云則川只解把定封疆不能同生同死當時好與拈下幘頭誰敢喚作龐居士舉僧問雲門一言道盡時如何門云裂破師彈指三下

特五

舉僧問睦州一言道盡時如何州云老僧在爾鉢裏裏師呵呵大笑

十一

舉本生和尚以拄杖示衆云我若拈起爾便向未拈起時作道理我若不拈起爾便向拈起時作主宰且道老僧爲人在甚處時有僧

第一五五冊

出云不敢妄生節目生云也知閻黎不分外
僧云低低處平之有餘高高處觀之不足生
云節目上更生節目僧無語生云掩鼻偷香
空招罪犯師云者僧也善能切磋爭奈弓折
箭盡然雖如此且本生是作家宗師拈起也
天迴地轉應須拱手歸降放下也草偃風行
必合全身遠害還見本生爲人處也無師復
拈起拄杖云太平本是將軍致不許將軍見
太平
舉僧問雪峯聲聞人見性如夜見月菩薩人

見性如晝見日未審和尚見性如何峯打三
下其僧復問巖頭巖頭打三掌師云應病設
藥且與三下若據令而行合打多少
舉太原孚上座參雪峯至法堂上顧視雪峯
便下看知事師云一千五百人作家宗師被
孚老一覷便高豎降旗孚至來日入方丈云
昨日觸忤和尚峯云知是般事便休師云果
然僧問雲門作麼生是觸忤處門便打師云
打得百千萬箇有什麼用處直須盡大地人
喫棒方可扶豎雪峯且道太原孚具什麼眼

舉安國問僧得之於心伊蘭作梅檀之樹失之於旨甘露乃疾藜之園我要箇語具得失兩意僧豎起拳云不可喚作拳頭國云只爲喚作拳頭師云無繩自縛漢拳頭也不識

舉僧請益雲門大師玄沙三種病人話門云

均五

十二

爾禮拜著僧禮拜起門以拄杖便捫僧退後門云爾不是患盲復喚近前來僧近前門云爾不是患聾乃云還會麼僧云不會門云爾不是患瘂僧於此有省師便喝云者盲聾瘂瘖漢若不是雲門驢年去如今有底或拈拄

豎拂不管教近前又不來還會麼不應諸方還奈何得麼雪竇若不奈何爾者一隊驢漢有堪作箇什麼以往杖一時打趁

舉僧問香嚴如何是王索仙陀婆嚴云過者邊來師云鈍置殺人僧問趙州王索仙陀婆時如何州曲躬叉手師云索鹽奉馬

舉鼓山示衆云若論此事如一口劒時有僧問承和尚有言若論此事如一口劒和尚是死屍學人是死屍如何是劒山云拖出者死屍僧應諾歸衣鉢下打揲便行山至晚問首

座問話僧在否座云當時便去也山云好與
二十棒師云諸方老宿總道鼓山失却一隻
眼殊不知重賞之下必有勇夫然雖如此若
仔細點檢來未免一時埋却

舉睦州問武陵長老了即毛端吞巨海始知

均五

十三

大地一微塵作麼生云和尚問誰州云問長
老云何不領話州云我不領話爾不領話師
云墮也墮也復云者葛藤老漢好與劃斷拈
拄杖云什麼處去也

舉仰山坐次大禪佛到翹一足云西天二十

八祖亦如是唐土六祖亦如是和尚亦如是
某甲亦如是山下禪牀打四藤條師云藤條
未到打折因什麼只與四下須是箇斬釘截
鐵漢始得大禪後到菴山白云集雲峯下四
藤條天下大禪佛叅山云打鍾著禪便走師

云者漢雖見機而變爭奈有頭無尾

舉玄沙與天龍入山見虎龍云前面是虎沙
云是汝師云要與人天爲師前面端的是虎
舉南泉山下有一菴主行僧經過謂菴主云
近日南泉和尚出世何不去禮拜主云非但

南泉直饒千佛出興亦不能去泉聞令趙州去看州見便禮拜主不管州從西過東主亦不管州又從東過西主亦不管州云草賊大敗拽下簾子便行歸舉似南泉泉云從來疑著者漢師云大小南泉趙州被箇擔版漢勘破了也

舉僧問風穴語默涉離微如何通不犯穴云常憶江南三月裏鷓鴣啼處百華鮮曾有僧問雪竇對他道劈腹剜心又且如何復云因風吹火別是一家傷鼈怨龜必應有主

永樂北藏

明覺禪師語錄

舉巖頭雪峯欽山到德山欽山問天皇也恁麼道龍潭也恁麼道未審德山作麼生道山云爾試舉天皇龍潭底看欽山擬議德山便打欽山被打歸延壽堂云是即是打我大殺巖頭云爾恁麼他後不得道見德山師云諸

詩五

十四

禪德欽山致箇問端甚是奇特爭奈龍頭蛇尾爾試舉天皇龍潭底看坐具便撼大丈夫漢將虎鬚也是本分他既不能德山令行一半令若盡行雪峯巖頭總是涅槃堂裏漢舉僧問智門和尚如何是般若體云蚌含明

第一五五冊

永樂北藏

明覺禪師語錄

第一五五冊

月僧云如何是般若用云兔子懷胎師云非
唯把定世界亦乃安貼那家若善能參詳便
請丹霄獨步

舉烏曰有玄紹二上座到曰云二禪伯近離
甚處云江西曰便打僧云久聞和尚有此機
要曰云爾既不會第二箇近前來僧擬議曰
亦打云同坑無異土叅堂去師云宗師眼目
須至恁麼如金翅擘海直取龍吞有般漢眼
目未辨東西拄杖不知顛倒只管說照用同
時人境俱奪

舉僧辭大隨隨問甚處去云峨眉禮拜普賢
去隨豎起拂子云文殊普賢總在者裏僧畫
一圓相拋於背後隨云侍者將一貼茶與者
僧雲門別云西天斬頭截臂者裏自領出去
師云殺人刀活人劍具眼底辯取

轉五

十五

舉雪峯問僧見說大德曾爲天使來是否云
不敢峯云爭解與麼來僧云仰慕道德豈憚
關山峯云汝猶醉在出去僧便出峯乃召大
德僧廻首峯云是什麼僧亦云是什麼峯云
者漆桶僧無語峯却顧謂鏡清云好箇師僧

向漆桶裏著到清云和尚豈不是據欵結案
峯云也是我尋常用底忽若喚迴是什麼被
他道者漆桶又作麼生清云成何道理峯云
我與麼及伊爾又道據欵結案他與麼及我
又道成何道理一等是什麼時節其間有得
不得清云不見道醍醐上味爲世所珍遇此
之人翻成毒藥師云看他父子相投言氣相
合知者謂粉骨碎身此恩難報不知者謂扶
高抑下臨危悚人毒藥醍醐千載龜鑑還會
麼者漆桶

舉僧問大梅如何是祖師西來意梅云西來
無意僧舉到鹽官云一箇棺材兩箇死漢玄
沙聞舉云鹽官是作家師云三箇也得
舉雲門問新羅僧爾是甚處人云新羅人門
云將什麼過海云草賊大敗門云爲什麼在
我手裏云恰是門云一任教趙師云雲門老
漢龍頭蛇尾放過者僧爲什麼在我手裏恰
是劈脊便打
舉北禪問僧近離甚處云黃州禪云夏在甚
處云資福禪云福將何資云兩重公案禪云

爭奈在我手裏云在手裏即收取禪便打者
僧不甘隨後趁出師云奇怪宛有超師之作
還知者僧麼只解貪前不能顧後若在雪竇
手裏棒折也未放在

舉睦州示衆云我見百丈不識好惡大衆方

特五

十六

集以拄杖一時打下復召大衆迴首丈云是
什麼有什麼共語處黃檗和尚大衆方集以
拄杖一時打下復召大衆迴首檗云月似彎
弓少雨多風猶較些子師云說什麼猶較直
是未在若據雪竇衆集一時打下便休或有

箇無孔鐵槌爲衆竭力善能擔荷可以籠罩
古今乾坤把斷師募拈拄杖云放過一著
舉玄沙見鼓山來作一圓相山云人人出者
箇不得沙云情知爾向驢胎馬腹裏作活計
山云和尚又作麼生玄沙云人人出者箇不
得山云和尚潛麼道得某甲爲什麼不得沙
云我得爾不得師云只解貪觀白浪不知失
却手橈

舉南泉示衆云王老師賣身去也還有人買
麼一僧出衆云某甲買泉云不作貴不作賤

作麼生買僧無語卧龍代云和尚屬專甲禾
山云是何道理趙州云明年與和尚作領布
衫師云雖然作家競買要且不解輸機且道
南泉還肯麼雪竇也擬酬箇價直令南泉進
且無門退亦無地不作貴不作賤作麼生買
別處容和尚不得

特五

十七

舉茱萸把一椀竹上堂云還有虛空裏釘得
椀麼時有靈虛上座出云虛空是椀茱萸便
打虛云莫錯打某甲茱萸休去師云若要此
話大行直須打了趁出

舉夾山與定山同行言話次定山云生死中
無佛則無生死夾山云生死中有佛則不迷
生死互相不肯同上大梅相見了具說前事
夾山問未審那箇親那箇疎梅云一親一疎
山又問那箇親梅云且去明日來夾山至來
日又問未審那箇親梅云親者不問問者不
親夾山住後云我當時在大梅失却一隻眼
師云夾山畢竟不知換得一隻眼大梅老漢
當時聞舉若以棒一時打出豈止劃斷兩人
葛藤亦乃爲天下宗匠

舉僧問保福雪峯平生有何言句得似羶羊挂角時福云我不可作雪峯弟子不得師云一千五百箇布衲保福較些些子

舉僧問長慶羶羊未挂角時如何慶云草裏漢云挂角後如何慶云亂叫喚云畢竟如何慶云驢事未了馬事到來師云寧可碎身若微塵終不瞎箇衆生眼長慶較些些子復云一般漢設使羶羊未挂角也似萬里望鄉關舉僧問巴陵祖意教意同別陵云雞寒上樹鴨寒下水僧問睦州祖意教意同別州云青

山自青山白雲自白雲師云問旣一般答亦相似其中有利他自利瞞人自瞞若點檢分明管取解空第一

舉趙州示衆云今夜答話去有解問者出來時有僧出州云比來拋磚引玉引得箇墜子

均五

十八

法眼和尚遂乃舉問覺鐵觜先師意作麼生覺云如國家拜將乃問甚人去得時有人出云某甲去得云爾去不得法眼云我會也師云靈利漢聞舉便知落處然雖如此放過覺鐵觜夫宗師話不虛發出來必是作家因什

麼拋磚引壑諸禪德要識趙州麼從前汗馬
無人見只要重論蓋代功

舉耽源辭國師歸省觀馬祖於地上作一圓
相展坐具禮拜祖云子欲作佛去源云某甲
不解捏目祖云吾不如汝師云然猛虎不食
其子爭奈來言不豐諸人要識耽源麼只是
箇藏身露影漢

舉瀉山問仰山甚處來云田中來瀉云田中
多少人山插下鋤子叉手而立瀉云南山大
有人刈茆山拈得鋤子便行玄沙云我當時

若見與踏倒鋤子鏡清云不奈船何打破岸
斗僧問明招古人意在插鋤處叉手處招喚
某甲僧應諾招云還曾夢見仰山麼師云諸
方老宿咸謂挿鋤話奇特也大似隨邪逐惡
若據雪竇見處仰山被瀉山一問直得草繩
自縛去死十分

簡五

十九

舉玄沙問僧近離甚處云瑞巖沙云瑞巖有
何言句僧云長喚主人翁自云諾醒醒著他
後莫受人瞞沙云一等是弄精覓甚奇怪却
云何不且在彼中僧云瑞巖遷化也沙云如

今還喚得應麼無對師云蒼天蒼天

舉雪峯問僧近離甚處云覆船峯云生死海未渡爲什麼覆船師代云久響雪峯待老老漢擬議拂袖便行其僧當時無語歸舉似覆船船云何不道渠無生死僧再至雪峯舉此語峯云此不是爾語云是覆船恁麼道峯云我有二十棒寄與覆船二十棒老僧自喫不干閣黎事師云能區能別能殺能活若也辯得天下橫行

舉德山圓明示衆云但有問答只豎一指頭

寒則普天普地寒師云什麼處見俱胝老熱則普天普地熱師云莫錯認定盤星森羅萬像徹下孤危大地山河通上嶮絕甚麼處得一指頭禪

舉僧問南院從上諸聖什麼處去院云不上天堂即入地獄云和尚作麼生院云還知寶應老落處麼僧擬議院以拂子驀口打復喚僧近前云令合是爾行又打一拂子師云令既自行且拂子不知來處雪竇道箇瞎且要雪上加霜

舉保福問長慶盤山道光境俱忘復是何物
洞山道光境未忘復是何物據二老宿總未
得勦絕作麼生道得勦絕去慶良久福云情
知向鬼窟裏作活計慶云爾作麼生福云兩
手扶犁水過膝師云俱忘未忘總由我保福
因什麼道未得勦絕約五酌然能有幾箇二十諸人又
作麼生道免得長慶在鬼窟裏師云柳絮隨
風自西自東

後顛頊即此物非他物是何物還有分付處
也無有般漢不解截斷大梅脚跟只管道貪
程太速
舉雪峯示衆云望州亭與爾相見了也烏石
嶺與爾相見了也僧堂前與爾相見了也保
福問鵝湖僧堂前且致望州亭烏石嶺什麼
處柜見鵝湖驟步歸方丈保福便入僧堂師
云二老宿是即是只知雪峯放行不見雪峯
把定忽有箇衲僧出問未審雪竇作麼生豈
不是別機宜識休咎底漢還有望州亭烏石

嶺相見底衲僧麼良久云擔版禪和如麻似粟

舉趙州問大慈般若以何爲體慈云般若以何爲體州呵呵大笑至來日州掃地次大慈却問般若以何爲體州放下掃帚呵呵大笑

詩五

廿一

師云前來也笑後來也笑笑中有刀大慈還識麼直饒識得也未免喪身失命

舉德山一日飯遲自掌鉢至法堂上雪峯見云者老漢鍾未鳴鼓未響托鉢向什麼處去德山便回峯舉似巖頭頭云大小德山不會

才後句山聞舉令侍者喚巖頭至方丈問爾不肯老僧那巖頭密啓其意山至來日上堂與尋常不同巖頭到僧堂前撫掌大笑云且喜得老漢會末後句他後天下人不奈何雖然如此只得三年明招代德山云咄咄沒處去沒處去師云曾聞說箇獨眼龍元來只有一隻眼殊不知德山是箇無齒大蟲若不是巖頭識破爭得明日與昨日不同諸人要會末後句麼只許老胡知不許老胡會
舉雪峯一日見獼猴乃云者獼猴各各背一

面古鏡三聖便問歷劫無名何以彰爲古鏡
峯云瑕生也聖云一千五百人善知識話頭
也不識峯云老僧住持事煩師云好與二十
棒者棒放過也好免見將錯就錯

舉偕問國師如何是本身盧舍那云與老偕
過淨瓶來僧將到淨瓶云却安舊處著僧復
問如何是本身盧舍那云古佛過去久矣雲
門大師道無朕跡師云直得一手指天一手
指地爭得無還會麼雲在嶺頭閑不徹水流
澗下太忙生

舉僧問洞山時時勤拂拭莫遣惹塵埃爲什
麼不得他衣鉢山云直饒道本來無一物也
未合得他衣鉢且道什麼人合得僧下九十
六轉語皆不相契末後云設使將來他亦不
要洞山深肯師云他既不受是眼將來底必
應是瞎還見祖師衣鉢麼若於此入門便乃
兩手分付非但大庾嶺頭一箇提不起設使
闔國人來且欸欸將去

舉僧問投子依稀似半月髮象若三星乾坤
收不得師於何處明子云道什麼云想師只

荷五

廿二

有湛水之波且無滔天之浪子云閑言語師云投子古佛不可道不知若點檢來直是天地懸隔纔問便和聲打

舉洛浦久爲臨濟侍者到夾山問自遠趨風乞師一接山云目前無閹黎此間無老僧浦便喝山云住住閹黎莫草草忽雲月是同溪山各異截斷天下人舌頭即不無爭教無舌人解語浦無對山便打師云者漢可悲可痛鈍致他臨濟他旣雲月是同我亦溪山各異說什麼無舌人不解語坐具劈口便撼夾

山若是箇知方漢必然明窓下安排

舉三聖問雪峯透網金鱗以何爲食峯云待汝出網來向汝道聖云一千五百人善知識話頭也不識峯云老僧住持事煩師云可惜放過好與二十棒者棒一棒也饒不得直是

公問五

什三

罕遇作家

舉伏牛爲馬祖馳書到國師處國師問馬祖有何言句示人牛云即心是佛國師云是什麼語話良久再問更有什麼言句牛云不是心不是佛不是物國師云猶較些子師代當

時便喝牛却問和尚此間如何國師云三點如流水曲似刈禾鎌師云是什麼語話也好與一拶見之不取千載難忘

舉玄沙問鏡清我不見一法爲大過患爾道不見什麼法清指露柱云莫是不見者箇法

麼沙云浙中清水白米從爾喫佛法則未在師云大小鏡清被玄沙熱瞞我當時若見但只向道靈山授記也未到如此

舉先報慈問僧近離甚處云卧龍慈云在彼多少時云經冬過夏慈云龍門無宿客爲什

麼在彼許多時云師子窟中無異獸慈云爾試作師子吼看云若作師子吼即無和尚慈云念汝新到且放三十棒師云奇怪諸禪德若平展則兩不相傷據令則彼此俱嶮還點檢得麼

舉船子云千尺絲綸直下垂一波纔動萬波隨夜靜水寒魚不食滿船空載月明歸師云者漢勞而無功忽若雲門道一句合頭語萬劫繫驢橛又作麼生免此過良久云莫謂水寒魚不食如今釣得滿船歸

舉投子問巨崇禪客老僧未曾有一言半句
挂諸方耳目何用要見山僧僧云到者裏不
施三拜要且不甘子云出家兒得恁麼沒碑
記僧繞禪牀一币而出子云有眼無耳朶六
月火邊坐師云也不得放過纔轉便與擒住
便喝是誰不甘若跳得出不妨是一員衲僧
舉祖師道六塵不惡還同正覺拄杖子是塵
有甚麼過過既無應合辯主所以道糞掃堆
上現丈六金身且拈在一邊赤肉團上壁立
千仞又放過一著直饒八面四方正好連架

第五

十四

打
舉古云眼裏著沙不得耳裏著水不得忽若
有箇漢信得及把得住不受人瞞祖佛言教
是什麼熱枕鳴聲便請高挂鉢囊拗折拄杖
管取一員無事道人又云眼裏著得須彌山
耳裏著得大海水一般漢受人商量祖佛言
教如龍得水似虎靠山却須挑起鉢囊橫擔
拄杖亦是一員無事道人復云恁麼也不得
不恁麼也不得然後沒交涉三員無事道人
中要選一人爲師

明覺禪師語錄卷第三

音釋

嗽胡筆切 瞪澄應切 簽音僉 邯邯音寒 鄆鄆音丹 簠簠音
求位切 眈側洽切 齋許活切 勦子小切 覲七據切
司覲竹栗切 霍忽郭切 臚午胡切

楊五

月五

永樂北藏

明覺禪師語錄

第一五五冊

永樂北藏

明覺禪師語錄

第一五五冊

明覺禪師瀑泉集卷第四

綺六

雜學小師圓應編

師自兩處道場多應機語句門人集之離三
已行於世斯所紀者乃垂帶自答及古今因
緣朝暮提唱辭意曠嶮而學黨未喻復致之

請六

請益師蓋不獲已隨所疑問以此以彼乍放
乍收或抑或揚或代或別近百五十則實一
時之能事也況圓應忝預叅承寧忘捃拾然
多聞未益誠有愧於宗師必記諸善言諒無
譏於弟子可命曰瀑泉集意以飛流無盡爲

義凡知我者幸同味焉時天聖八年八月十
五日圓應序

上堂汝等諸人盡是久經陣敵慣戰作家倚
天長劒即不問你作麼生是袖裏藏鋒代云
寡不敵衆又云彼此

上堂寡不敵衆什麼人分上事代云總由和
尚又云彼此又云龍蛇易辯袖子難瞞許你
眼正頂後一相拈得也無代云收

有時云收之一字飲氣吞聲作麼生辯代云
袖子難瞞

或云傾湫倒嶽尋常之用不涉泥水道將一句來代云三千里外

示衆云三千里外還且如何代云過或云佛未出世時一人人鼻孔遠天出世後爲什麼杳無消息代云賊不打貧兒家問僧云賊不

打貧兒家因什麼却打代云須到如此

或云祖師不到處時人知有時人不知處過在祖師作麼生辯代云不得春風華不開上堂云不得春風華不開箇箇道我會會即且致作麼生舉代云時人相師又云空劫已

前徒指注空劫之後錯商量正當空劫什麼人爲主代云本是將軍致太平

有時云太平本是將軍致莫錯認定盤星我爲拈了也還會麼代云掩面出去

或云交鋒兩刃要定生死彼此無傷功勳不

詩六

立作麼生是將軍正今代云到即不點

或云到即不點還甘也無代云赤心片片

有時云釋迦老子出氣不得甚麼處請訛代云填溝塞壑又代云退身三步問云填溝塞壑負恩者多甚處見老底代云香積世界

或云五千四十八卷止啼之說如今啼止也
還我黃葉來代云事不孤起

有時云事不孤起你也分一半代云哪又云
合到某甲又云單傳心印過犯彌天甚人委
悉代云須見如此

上堂須見如此著甚來由代云也是

或云善來文殊還知敗闕麼代云一箭兩垛
或云一箭兩垛爲什麼却敗闕代云善來文
殊

或云乾坤崩陷且致再見天日這將一句來

代云悔不愼當初

有時云悔不愼當初便下座却問僧他後作
麼生舉代云好事不如無

有時云雄兵百萬且定邊疆劍客三千若爲
驅使代云不許夜行投明須到

續六

示衆云不許夜行投明須到何似生代云孟
常門下或云一筆勾下不甘底出來代云只
宜拄杖子

上堂云只宜拄杖子勾下屬何人代云傍觀

者

或云威音王已前無師自悟是第二句還我第一句來代云掃土而盡問僧掃土而盡你還知麼代云因誰致得

有時云三世諸佛說夢云代祖師說夢翠峯今日說夢還有夢見底麼代云掀倒禪牀

或云掀倒禪牀蓋是本分過在什麼處代云惱亂春風卒未休

或云奔流度刃也是尋常啐啄同時略請相見代云什麼處去也

上堂云什麼處去也代云日月易流又云針眼裏藏身即不問你作麼生是遊戲十方代云踞虎頭收虎尾
一日云踞虎頭收虎尾諸方未曾見代云也是

麼生道代云春無三日晴

示衆云春無三日晴去住還堪笑且問諸衲僧曠却何時了代云某甲只管看

或云有佛法處不得住無佛法處急走過趙州爲什麼摘楊華代云更事多矣問僧更事

多矣亦要商量代云莫教屈著

有時云明眼袖僧入門便語墮三十年後誰是知音代云拂袖便出

有時云拂袖便出也好與三十棒代云賊過後張弓

或云七縱八橫拈却把定乾坤眼四爲什麼却

有沙代云黃連未是苦

或云黃連未是苦黃檗好爲隣復問還辯得這時節麼僧云不會自代云抑已而已

或云繞天下行脚到處豈無尊宿相爲還有

盡力道得底句麼代云口只堪喫飯

上堂云口只堪喫飯雲門大師拈了也你來者裏聽什麼碗鳴聲以拄杖一時打下代僧當時但近前把住拄杖云和尚今日困又云關候子即不問上座作麼生是牛頭橫說豎說代云著甚來由

一日云著甚來由便下座代云能有幾箇有時拈起拄杖云天不能蓋地不能載復以拄杖畫一畫云百千諸佛諸代祖師盡向翠峯乞命代云官不容針

或云舉一明三爲甚不著便代云作賊人心
虛又云文殊起佛見法見貶向二鐵圍山衲
僧起佛見法見列在三條椽下翠峯起佛見
法見誰敢覩著代云秤尺在手

或云洞庭湖水一吸淨盡魚鼈向甚處藏身

綱六

五

代云咦又云喝下承當崖州萬里棒頭薦得
別有條章作麼生是衲僧本分代云惡

或云虛空爲鼓須彌爲槌王老師不打還肯
得諸方也無代云千年田八百主

有時云觸髅常千世界鼻孔塵觸家風拈却

別致一問來代云祖師遺下又云你若龜頭
鼈頭向後道親見翠峯好代云何必

上堂天不能蓋地不能載衲僧坐斷如恒河
沙闌市裏指出一箇來代云便捫傍僧

或云生門易過死門難入逆順無拘底爲什

麼不垂手代云收得安南又憂塞北

或云荒田不揀草變爲金信手拈來金變爲
草古聖日用不知且致你爲什麼臨機道得

代云如蟲禦木

上堂云如來惟一說無二說穿却衲僧鼻孔

換却衲僧眼睛即得若教我明破恐帶累你
不是好人代云欲見其師先觀弟子

或云諸佛有難炭庫裏衆生有難火燄裏你
衲僧不得動著代云魯般繩墨

或云火待日熱風待月涼北斗南星句不要

你道留與後人貶剝代云一言已出駟馬難
追

上堂云色不異空空不異色園頭甚要古人
道了也因什麼知而故犯代云爭奈轉多問
僧我道轉多你作麼生僧云某甲不會師云

惱亂春風卒未休

或云本分事道我知有將錯就錯甚人承當
代云不惜眉毛者

或云年來一度春也畢竟事作麼生代云藏
身露影

編六

十

或云至道無難惟嫌揀擇德山不在付與黃
檨代云洗脚上船復問僧云我恁麼道正是
時人窠窟趙州直得五年分疎不下你何不
救取僧無語師云雪峯道底

上堂云開門待知識知識不來過直得出門

相接爲什麼土曠人稀代云和尚年老

或云放憨道著藥忌即不管你死中得活致

將一問來代云略無些子

上堂云遠則照近則明你會也笠子拄杖拈

放一邊入水見長人作麼生辯代云平出

或云因一事長一智針筒藥袋不得失却如

履輕冰道將一句來代云以已妨人又云會

則事同一家且放你過不會則東西南北付

與驢年代云一日便頭白

或云今日也恁麼明日也恁麼第三第四不

問你後五日事作麼生若道只恁麼代云苦
哉佛陀耶

有時云什麼劫中無祖佛你不著便猶可代
云解笑底亦少或云朝堂門下難舉令雲門
道底不要代云但咳嗽一聲

詩六

一日云謀臣猛將用不著到即不點是什麼

七

人代云不犯之令

上堂云若道得隔身句知你是箇了事人忽
若總道不得我也知你親代云猛虎不食其
子

一日云千兵易得一將難求上將來也三軍在什麼處代云退後退後

或云閫內者不出閫外者不入將相雙行句作麼生道代云弔民伐罪

因普請問僧甚處來云摘茶來師云茶園裏有玄沙見底還見麼代但指露柱云和尚問又問僧甚處來云摘茶來師云人摘茶茶摘人不問你無底籃子重多少代云慣得其便又問僧甚處來云摘茶來云茶叢列作鼻孔茶葉是你眼睛作麼生摘代云今日不著便

一日云佛法不用學觸目皆成滯百城既未遊樓閣門長閉勸君廻首看請下一轉語自云莫辜負人好

一日問僧南泉斬猫兒你作麼生會云有什麼難師云作麼生無語代云一刀兩段

一日遊園次問僧苦瓠連根苦甜瓜徹蒂甜明得箇什麼邊事僧無對代云平出

一日請益退侍者問訊云和尚不易師云有什麼不易無對師代云法堂上寸草不生僧便禮拜師云若不是我

師一日問僧諸方道不得底句你作麼生道
僧云天平地平云滑麼則王老師不如你僧
無語師云只道得一半

師一日見僧來師云是什麼物與麼來僧云
口痛祇對和尚不得師云鼻孔哧僧無語師

云黃連未是苦

詩六

八

師一日見二僧來拈起拄杖云與你二人分
取僧云只恐和尚不平第一僧云那上座先
到雪竇師云有功者賞

師一日見二化主城中歸問云你憑箇什麼

入城教化衆生僧云雖有好心且無好報第
二僧云禍不入慎家之門師云近火先焦
師一日晚叅問僧是什麼時候也僧應諾師
便喝僧云和尚何不領話師云日勢稍晚
師一日見僧來拈起拄杖云我兩手分付你
作麼生僧退身云不敢師云為什麼棒上不
成龍僧云三十年後恐辜負和尚師放下拄
杖云哧哧

師一日問僧你見雪竇後錄未僧云見了師
云向甚處見我僧云也知和尚是川中人師

將拄杖打一下云夢見

師一日見僧出歸師云開市裏還見天子麼
僧無語師代云非但又云苦哉佛陀耶

一日十數僧待立次師云佛法無人說雖慧
不能了復問僧還有無師自悟底麼衆無語

精六

九

師云負命者上鉤

師因在莊數僧侍立次師問云維摩老云步
步是道場這裏何似山裏衆下語師皆不諾
師代云只恐和尚不肯

師一日問僧你作箇什麼來僧云合靈寶丹

來師云靈即不問作麼生是寶僧云不敢祇
對和尚師不肯自代云洎與和尚答話

師一日問僧你浴未僧云某甲此生不浴師
云你不浴圖箇什麼僧云今日被和尚勘破
師云賊不打貧兒家

師一日同僧遊山次到開山和尚塔頭僧云
見說開山便是黃巢師云黃巢是草頭天子
爲什麼却作住山人僧云忌辰也好與他設
粥師不肯自代云賞不避仇讎

師一日同三五僧看種田師云靈苗無根作

麼生種僧云明年更有新條在師云你問我
我與你道僧便問師云分付田舍奴

師一日出城見下院山主師云既是山主爲
什麼却在城中山主無語師自云負命者上
鉤來

師一日與數僧遊山次見牯牛舉頭師問牯
牛舉頭作什麼僧云怕和尚穿却師不肯自
云看入草底

師一日燒亡僧師問僧還將得火來麼僧云
將得來師云弄假像真

師一日問僧甚處來僧云浴來師云三身中
那一身浴僧云或鼓聲前或鼓聲後師云飽
叢林

師一日問僧你尋常爲什麼不上來僧云長
上來只是門閉師云爲什麼不入來僧云來

荷六

十

也師云賊過後張弓

師一日爲首座寫真師云既是首座爲什麼
却有兩箇首座云爭之不足師云你問我我
與你道首座擬問師云雪竇門下
宋太宗皇帝因事六問當時無人奏對因入

寺見僧看經問云看什麼經對云仁王經帝云既是寡人經爲甚在卿手裏師代云皇天無親唯德是輔

因入塔院問僧卿是甚人僧云塔主帝云此是寡人塔爲什麼卿作主代云蓋國咸知

因僧燒却藏經朝見告乞宣問昔日摩騰不燒如今爲什麼燒却代云陛下不忘付囑因帝夜夢神人報云請陛下發菩提心帝至曉宣問左右街菩提心作麼生發代云實謂今古罕聞

因僧朝見帝問其處來云卧雲來帝曰朕昨卧雲深處不朝天爲什麼却到這裏代云難逃至化

因僧朝見帝賜坐僧云陛下還記得麼帝云甚處相見來僧云靈山一別直至如今帝曰

以何爲驗僧無對代云貧道得得而來

詩六

十一

唐憲宗迎舍利現五色光百辟俱賀惟韓愈端立帝問百僚皆賀卿爲甚不賀愈曰臣曾看經來佛光非青黃赤白等相此是神龍荷助之光帝云作麼生是佛光代云陛下高垂

天鑑

裴相公捧一尊佛像於黃檗前跪云請師安
名檗云裴休師代相公當時便喝

廣南劉王請雲門入內於舍春殿坐次帝令
鞠常侍宣問靈樹果子熟也未門云甚年中
得信道生師代進語云猶帶酸澀在又代雲
門云聖意難測又云諾諾復宣問如何是禪
云皇帝有敕臣僧對代進語云錯又代雲門
云念以臣僧年邁
龍光問僧名什麼云自觀光云自觀見什麼

代云有悞龍光

悟空禪師問座主講什麼經云法華經空云
有說法華經處我現寶塔當爲證明座主讚
請甚人證明代云私通車馬

投子示衆云汝等諸人盡道我實頭若出門
三步有人問你作麼生是投子實頭處作麼
道代云疑殺天下人

有老宿見官人手中執笏乃問在官人手中
爲笏在天子手中爲珪在老僧手中喚作什
麼代云弄巧成拙

四祖到牛頭後庵見虎便作怕勢牛頭云和尚猶有這箇在祖云適來見什麼代云但亦作怕勢又代云泊合放過

僧問惠濟古人道得坐披衣向後白看如何是得坐披衣濟云暢我平生代云諾諾

綱六

十二

問投子定慧等學明見佛性此理如何投子云打水用桶舀粥用杓代云爭得不問

玄沙見孚上座便云新到相看孚云已相見了也沙云什麼劫中曾相見來孚云莫瞋睡別云這賊敗也

玄沙與地藏方丈說話夜深沙云侍者關隔子門汝作麼生出得地藏云喚什麼作門別云珍重便行

崇壽問僧泉眼不通被沙礙道眼不通被甚麼礙僧云眼礙別云強將下無弱兵

保福在疾問僧我與你相識年深有何名方妙藥相救僧云甚有聞說和尚不解忌口別云只恐難爲和尚

有西天聲鳴三藏到王大王處王令玄沙驗過玄沙以銅火筋擊鐵火爐問三藏云是什麼

麼聲云銅鐵聲沙云大王莫受外國人瞞師
別云大王宜加信敬又別三藏云莫瞞外國
人

國師問座主講什麼經云金剛經國師云最
初是什麼字座主云如是國師云是什麼別

云以拄杖便打

第六

十二

陸郎中問仰山如何是不斷煩惱而入涅槃
仰山豎拂子郎中便拜異時仰山却問郎中
曾問不斷煩惱而入涅槃老僧豎拂子郎中
作麼生會陸云據某甲見處入之一字也不

用得仰山云入之一字不爲郎中師云作麼
生會云別陸云拂子到某甲手裏也又別仰
山後語云我將謂你是箇俗漢

陸大夫問南泉大悲菩薩甚處得許多手眼
來泉云如國家用大夫作什麼別云不及大
夫所問

僧問雲門十方薄伽梵一路涅槃門如何是
一路涅槃門門云我道不得云和尚爲什麼
道不得云你舉話即得別云淺水無魚徒勞
下釣

吳尚書訪睦州至門首便問三門俱開弟子
從何門而入睦召尚書尚書應諾睦云從信
門而入別云客是主人相師

南泉遷化陸巨大夫到院主云大夫何不哭
大夫云道得即哭長慶代云含笑不合哭別

云蒼天蒼天

雲巖遷化時道吾問離却殼漏子了後向何
處再得相見巖云向不生不滅處相見別云
喚侍者與我記取這一問

僧問法燈百骸俱潰散一物鎮長靈未審百

骸一物相去多少燈云百骸一物一物百骸
別云吾不如汝

僧問歸宗如何是佛宗云我向你道還信麼
云和尚言重爭得不信宗云只汝便是別云
侍者寮裏喫茶去

荷六

十四

麻谷持錫到國師處振錫而立國師云汝既
如是何用見吾谷又振錫一下別云泊不到
此

妙濟於僧前書一字問云是什麼僧云不識
濟云滿口道著別云老僧罪過

僧問曹山清稅孤貧請師拯濟山云稅闍黎
應諾山云清源白家酒三盞猶道末霑唇別
云稅闍黎應諾是什麼心行

僧問玄覺先師舉不及處請和尚舉覺云聽
者須是奇人別云大眾看者一員禪客

石頭問讓大師不慕諸聖不重己靈時如何
讓云子問太高生何不向下問將來別云三
十棒教誰喫

僧問玄沙盡十方世界是一顆明珠學人爲
什麼不會沙云用會作麼別云諸方即得我

這裏不得

玄沙問南際云此事惟我能知長老作麼生
會際云須知有不求如者別云雪峯門下幾
箇如斯

法眼問百法座主云百法是體用雙陳明門

特六

十五

是能所兼舉座主是能法座是所作麼生說
箇兼舉有老宿代云和尚喚什麼作法座別
云和尚分半院與某甲始得

睦州問座主講什麼經云涅槃經州云問大
德一段義得麼云問什麼義州以脚趂空吹

一吹云箇是什麼義云經中無此義州云脫空謾語漢此是五百力士揭石義麼老宿代云和尚瞞某甲瞞大衆別云和尚慣得其便雲門示衆云世尊生下一手指天一手指地周行七步目顧四方云天上天下唯我獨尊我當時若見一棒打殺與狗喫貴得天下太平法眼云雲門氣勢甚大要且無佛法道理老宿代云將謂無人證明別云鉤在不疑之地

巖頭雪峯欽山三人坐次洞山點茶來欽山

閉眼洞云什麼處去來欽山云入定來洞云定本無門從何而入老宿代云大有人恁麼會別云當時但指巖頭雪峯云與者兩箇瞋睡漢茶喫

雲門問僧近離甚處云新羅門云將甚麼過海云草賊大敗門云你爲什麼在我手裏僧云恰是別云噓噓

雲門到洞巖得數日上叅恰見巖下來巖問什麼處去云親近去巖云亂走作什麼云暫時不在巖云什麼處去來別云好與三十棒

東平問官人風作何色無對却問僧僧提起衲衣云者箇在府下鋪平云用多少帛子别云蝦跳不出斗

雲門問曹山密密爲什麼不知有山云只爲密密所以不知有別云達磨來也

綱六

十六

雪峯在國清拈起鉢孟問座主道得與你鉢孟主云此是化佛邊事別云只恐鈍置和尚峯當時云你作座主奴也未得主云某甲不會峯云你問我我與你道座主方禮拜峯便踏倒後座主舉似雲門云某甲得七年方見

門云你得七年方見云是別云草賊敗也道吾見雲巖掃地問云太驅驅生巖云須知有不驅驅者吾云恁麼有第二月也別云泊合放過

清峯辭雪峯問甚處去清峯云識得者漢即知去處雪云你是了事人亂走作什麼別云西天斬頭截臂清峯當時云和尚莫塗汙人好雪云我即塗汙你你道古人吹布毛作麼生清峯云殘羹餽飯已有人喫了也雪峯休去師出雪峯語云一死更不再活

韶山勘僧云莫便是多口白頭因云不敢韶云多少口云徧身是韶云大小二事向甚處出云韶山口裏別云從來疑著韶山

保福到庵主處茶話次庵主云有僧問某甲如何是祖師西來意某豎起拂子不知得不

詩六

十七

得福云某爭敢道得不得有箇問有人讚歎此事如虎帶角有人輕毀此事分毫不直一等是恁麼事爲什麼讚毀不同庵主云適來出自偶爾有老宿云毀又爭得又老宿云惜取眉毛師都別云若非和尚證明拂子一生

無用

石頭大師叅同契

予嘗覽斯作頗見開士皆摘辭聲極成贅厭道因亦隨興以擬之匪求蝕木於文也噫先覺洪規可洞照遐古豈復情謂逾越於其間哉蓋往往學者抑問勉意不獲而已其或金沙混流淘之汰之固必存彼匠手明矣竺土大仙心誰是東西密相付惜取人根有利鈍作麼道無南北祖且歎靈源明皎潔摩訶被派關流注亦未執事元是迷展開契理

亦非悟拈却門門一切境捨短長回互不回互

以頭回而更相涉這箇是不爾依位住莫錯

星色本殊質像開眸聲元異樂苦掩耳聞合

上中言心不明明濁句掛壁四大性自復

依所如子得其母也可知火熱風動搖自消水

濕地堅固從旦暮眼色耳音聲海晏鼻香舌鹹

醋可憑然於一法重報依根葉分布好明

本末須歸宗惟我尊卑用其語不犯當明中

有間必勿以間相遇明還當間中有明見一

三勿以明相覩無異明間各相對若為比如

前後步此不如萬物自有功旨爾當言用及處

縱橫十字事存函蓋合看子理應箭鋒挂莫教承

言須會宗非未勿自立規矩難并觸目不會

道又何運足焉知路惡不進步非近遠唱彌

迷隔山河爾和彌謹白叅玄人同歸先陰莫

虛度誠哉是

真讚

禪定大師

虛凝不器有象殊域伊何郢流卓爾原極驚

峯崔嵬蟾輪乍回列刹望重勞生眼開開也

誰覩迅振高古或葉或華自三自五天子褒
稱芳禪定師而今而後芳香風吹

集賢殿學士曾侯

天石麟豈輕獻日角月角藏億萬當年文陣
獲全功不奪龍頭幾人怨

若冰大師

冰之有光非珠澄徹山之有光非玉凝潔若
水大師殊彼清絕殊芳必羣絕芳可觀一字
根極三千頂住乍曰義龍或稱律虎相對風
規分不分金田獨步君看取

清照大師

巨海秋碧鰲峯畫寒巧出匠手依依對看寶
几乍凭華巾非結以蘇續蘇話月指月古芳
今芳請試甄別

恭首座

約六

道離微芳誰與隣貌古澹芳飛清塵巖檜蒼
蒼經幾春乳竇堂中第一人

十九

禪徒寫予幻質復請為讚辭曰

祖佛怨芳非其師叢林害芳誰相資水枯雪
殘深索索水冷雲澹空累累寶聖錯僧繇知

永樂北藏

明覺禪師語錄

第一五五冊

人間天上爭容伊

周生強圓夢身子亦不能伏筆

上下三指彼此七馬枯華未曾微笑何也石
謂玉弓器必分水凌虛方月非下不知誰是
傍觀者

咄者枯耕遽生瓜葛來自三川欺手兩浙指
鹿爲馬將日作月罪弓彌天焉可分說

廣慧禪師

寥寥雄機落落虛宇本之不兆傳之奚取取
既有規規還倫古凝明孤寬垂應萬端海蚌

先絕天珠影殘南來北來玄眸可觀

安巖山照禪師

并序

愚昔遊漢水抵廬嶽率訪叢室襲禪家流偕
象馬蹴踏至於心口憤悱品藻當代誠難其
師然非厚誣方來且指掌輪握何取豈斯歟
陪老作覩繪真相古之今之歎恨亡矣高深
莫究其極明晦靡盡其際故時欽依乃勉挾
稱誅庶文外之士道存而同歸者也
覺雄慧燈記飲光滅光聯不已龍昌遽絕善
續者誰梅峯之師化偃二浙聲流四維大名

無當高讓太白韜晦殊運虛明曠索歸休安
巖寒籠翠杉我笑方外華非類啣郢工筆狂
枕儀頓舉肩雲頂絲秋蟾夜渚靜應南軒方
相對時空生未解芳聞斯語開眸凝瞻迅雷
不及掩耳

二六

二十

明覺禪師瀑泉集卷第四

音釋

据

舉慈切
拾也

潰

胡對切
散也

餽

色求切
飯壞也

蹴

子六切
踏也

永樂北藏

明覺禪師語錄

第一五五冊

明覺禪師祖英集卷第五

綺七

參學小師文政編

師之形言也且異乎陽春白雪碧雲清風者也夫大圭不琢貴乎夫真至言不文尚於理實乃世之衡鑑豈智識而擬議哉師自戾止翠峯雪竇或先德言句淵密師因而頌之或感興懷別貽贈之作固亦多矣其有好道者並錄而囊之一日總緝成二百二十首乃寫呈師師曰余偶興而作寧存于本不許行焉禪者應曰乃祖闡千載之芳烈也勿輕舍諸

綺七

一

師察其慙志勉弗獲已抑而從之文政幸侍座机輒述序引用識歲時炎宋天聖十年孟陬月文政謹序

偈頌

送寶相長老并序

大師歡禪德將赴丹丘辟命光闡宗乘蓋時應必行固不可抑留者也且撫會之作肇曠絕之道雖一凝一流一彼一此又何間然率織蕪辭以代贐別奧域靈區存物外獨標台嶺爲絕槩掩勝潛

奇列作屏堆青寫碧深如黛彤霞暖影生巖
壁香桂茂陰籠蘚石赤松子也浪虛閑白道
猷号大輕擲曹溪有叟歸其中風從虎号雲
從龍乘興正值二三月坐斷還依千萬峯華
飛飛日遲遲清飈颭颭吹無時玲瓏八面自
回合峭峻一方誰敢窺窺來須得乾坤眼照
古騰今謂非間若能此去副全提開發人天
有何限
送法海長老
常愛裴相國式芳塵斷際高風慕要倫擬欲

事師爲弟子不知將法付何人常愛李相國
垂列星藥嶠深源宅性靈我來問道無餘說
雲在青天水在瓶緬想當時二台輔出鎮藩
維訪諸祖寥寥浮幻輕百年落落宏規照千
古今聞仙都賢太守入政褰帷聲浩浩英佐
一一分化條終七文經武緯亦難討遠遠牋函飛
乳峯選開士号恢吾宗覲夜光非震滄海聆
正音豈玩焦桐徒誇麟龍自西自東應排罔
象得象必須覺雄讓雄今既塞請還也奇別
茫茫普熱紛紛下雪倒流四河載發枯枿卷

舒立方外乾坤縱橫掛域中日月黃頭碧眼
知未知去去憑誰繼清絕

送文政禪者

古有焦桐音聽寡不在彈古有陽春曲和寡
不在言言兮牙齒寒未極離微根彈兮歲月
闌未盡昇沉源少林幾坐華木落庾嶺獨行
天地寬因笑仲尼溫伯雪傾蓋同途不同轍
麟兮鳳兮安可論許兮巢兮復何說秋光澄
澄蟾印水秋風蕭蕭葉初墜送君高蹈誰不
知如曰不知則爲貴

送昭敏首座

君不見鷲峯勝集百萬茫茫等閑過壞衲之
外皆清儻君又不見熊嶺孤運歲月索索艱
難生深雪之中有一箇宛轉流落千餘年危
分嶮布空平闌辯龍蛇兮眼何正擒虎兕兮
機不全石窓四顧滄溟窄寥寥不許白雲白
掣斷金鎖天麒麟高舉鐵鞭擊三百猶輕舍
爭知也別有七星光闌射風前把欲贈行人
將報不平繞天下

送知白禪者

永樂北藏

明覺禪師語錄

第一五五冊

松不直棘不曲誰笑卞和三獻玉經天緯地
太無端邁古超今亦輕觸靡霸東何必云素
範還還真規復復梅檀葉落香風清千里萬
里長相逐

送勝因長老

黃梅散席三百載續燄聯芳事空在宗兮派
兮生異端華兮葉兮太煩碎韶陽間出多慷
慨權要英雄曾絕待曲木據位知幾何利刀
剪却令人愛近還有箇披老衲楚甸橫身風
颭颭鐵作一尋非等閑壁立千仞須摧踏報

君知江南江北徒纍纍龍轉海運兮纖鱗片
甲雷奔電驅兮寸毫尺釐斯言勿謂存規矩
平不留兮險非取周行獨立如便休誰振宏
綱照千古

送重郢禪者

春雨如膏春雲如鶴忽此忽彼乍休乍作枯
荻離離維風太遲幽石片片遼空亦危一華
開五葉兮不相似獨孤明兮還自知還自知
歷魏遊梁徒爾爲

送僧歸靈隱

因謁白雲無羈

白雲無羈冷淡清奇雪格未可鶴態還卑垂
天沃日兮似結不結爲雨從龍兮後期必期
噫悠悠忽爾春風吹南北東西唯我知誰知
齒菖峯前布影時

送僧之石梁

續七

萬卉流芳不知春力巖畔澗底感紅皴碧乘
興復誰同孤蹤遠讎敵君不見五百聖者導
雄機靈峯晦育深無極寒山老寒山老隨沉
跡迢迢此去須尋覓華落華開獨望時記取
白雲抱幽石

送師旻禪者

深巖寂寂披蘭芷碧霧紅霞映流水空生別
我期末期絕域殊方擬輕擬堪笑歸嶺南奔
馳何鄙彼危急亂拋下盡云提不起伊予本
自不將來相送奚憑掛唇齒旻禪客旻禪客
師子子應須落落存終始君不見古人有言
兮撲碎驪龍明月珠大丈夫到如此行行不
用頻彈指

寄白雲長老

八紘雲靜明寥泬夜永松堂對寒月凋殘片

永樂北藏

明覺禪師語錄

第一五五冊

葉墜虛庭冷寂何人立深雪因憶錢唐邵禪
者十載巖栖曾未下分飛誰謂絕相同遠念
冥冥欲奚寫忽聞赴請之仙都聲光藹藹登
清途孰云天驥驟方外自笑大鵬離海隅乾
坤窄乾坤窄湛盧潛射斗牛白茫茫無限未

終七

五

歸人到必爲時除點額

送智遷首座

雲蘿杳杳藏巖曲碧疊清飛冷相促瘦藤輕
袖休便休短筇殘芳續何續禪家本自冥羈
絆洲渚園林曾不憚十影神駒立海涯五色

祥麟步天岸君看取君看取巾地茫茫有誰
舉瓊甌頻磨如未回爲吾深憶盧公語
送善遷首座

名之基實之蒂深兮固兮宛相繼古之名也
在希聲今之實也同浮瞽子州善卷之流也
堯駟舜馳讓無暇歸去來兮歸不歸到頭未
出冥冥者吾徒孰謂標奇絕動靜憑君試甄
別葉零零兮秋暮半凋華片片兮春暖齊發
暹禪老暹禪老意曾高曠排沽待忽致譏褒
天人列請兮屢輕笑祖佛位卑兮還擬述我

恐逃之逃不得大方無外皆充塞茫茫擾擾
知何極八面香風惹衣袂

送僧

吳山碧楚江碧吳楚悠悠興何極一尋寒木
自爲隣三事秋雲更誰識乾坤不是無知己

玉石休云辨真僞待時沾譽漫淪生晦跡韜
光亦何意春風急春風急八駿奔馳追不及
南北東西把定時爲君直上孤峯立

古有談
之言也

觀氣分
技莊獨

頌藥山師子話送僧

永樂北藏

明覺禪師語錄

斥想金毛師子子梅檀林下青莎裏置也置
也威自全一出六出眉剔起非擬擬知幾幾
星流不問三千里天外風清哮吼時爲君吸

盡西江水

吐

送秀大師

巖竇宵寒擁山帔月高古木霜禽睡西庵禪

編七

六

者來扣門別我凌晨下層翠欲留不可留寫
意不及意屈眴迢迢安足云華偈聯聯太容
易君不見劉陽叟絕希冀送人只道無他事
行行會有知音知何必清風動天地

第一五五冊

送廣華嚴歸鷲峯

海山孤僻非蓬島
霧冷雲深松桂老
有客凝冬何太高
巨野宵征苦相討
巖房杳杳凌寒空
冰霜落落分譚叢
誰云百城沉古月
自笑八面生清風
依然別我還歸去
惠理之徒望回馭
重重無盡樓閣門
到必爲時略輕據

送遠塵禪者

衲卷殘雲風高絕
鄰倚天照雪堪抗
要津八紘極目兮
春山若黛九野縱
步兮汀草如茵三
十四老耒輕識凜
然方外奚相親

送德隆山主

霜葉凋殘巖風凜
寒彼之禪老忽下
崇巖衲有雲兮曾
卷未卷琴無絃兮
解彈不彈迢迢既
行宜聽斯語明閭
路岐生死洲渚而
今而後知不知類
綱委地憑誰舉

結七

七

送澄禪者

春色依依襲雨原
草春風浩浩拂我
窓牖念此分飛贈
無瓊玖片片亂飄
巖上梅條條縱舞
溪邊柳澄禪澄禪
聽斯言古也今也
行路難知之者石
火星流未急不知
者龍驥步驟

曾寬看看孰云平地起波瀾

送惠儔禪者

少林風規何大瀟灑籠古罩今睥真睨假誰
云發機射虎自笑品類觀馬劍客茫茫不要
呈覩人往往須擒下儔禪儔禪崢嶸象駕

送惠文禪者

正法眼絕塵沙二三四七水月空華千燈續
燄曾間五葉分披未葩君不見卷席百丈掩
耳丹霞龍行虎步爭孤立盡同雲雨去無涯
文禪文禪騰煥吾家

永樂北藏

明覺禪師語錄

送道成禪者

曹溪流非止水一點忽來千波自起直須釣
鼇釣鯨莫問得皮得髓君不見石頭有言子
聖不慕他靈不在已成禪成禪誰家之子

送清演禪者

我年老大心力衰微贈別無語冥同振飛因
思古之送人有言吾不知其殊途同歸獨愛
新豐曲騰清輝寸草不生千萬里出門春色
共依依
送繼寶禪者

第一五五冊

寶非寶日杲杲上上機無處討赤水求來何
太狂荆山覓得苦相惱不惱不狂排夜光險
惡道中爲津梁

送小師元楚

道之冥機一何相守汝競光陰我親蒲柳母

特七

厚弁之奪席毋薄愚之誦筵深思彼伐木丁

丁之聲照古照今兮宜善求友

送清果禪者

春雨濛濛春風颺颺動兮靜兮匪待時出雲
霞閑澹作性金鐵冷落爲骨知我者謂我高

蹈世表不知我者謂我下視塵窟道悠隨方
情融羈鎖紫栗一尋青山萬朵行行思古人
之言無可不可南北東西但唯我

酬行齋長老

黃金爲骨松爲姿道高曾鄙天人師有言遺

我千古奇無人知石虎吞却木羊兒

至人不器

誰當機舉不賺亦還稀摧殘峭峻銷燦玄微
重關曾巨闢作者未同歸玉兔乍圓乍闕金
烏似飛不飛盧老不知何處去白雲流水共

依依

因事示衆

石本落落玉自碌碌古之今之一何警速師
子不咬麒麟猛虎不食伏肉君不見洞庭孤
島煙浪深木馬追風有人識

詩七

九

日暮遊東澗

五首

極目生晚照溪雲偶成朵大朴曾未分青山
自唯我

極目生晚照遠樹籠微陰誰知清淺流別有
滄海深

極目生晚照幽情眷蘭芷白蘋葉裏風不在
秋江起

極目生晚照步影何遲遲歸禽古木中相對
頻相窺

極目生晚照蓬萊匪仙境釣得十二鰲重來

謝孤影

思歸引

三首

一住翠峯頂兩見溪草綠不知朝市間幾番
生榮辱蕭條巖上雲冷淡水邊竹報誰歸去
來向此空踟躕

永樂北藏

明覺禪師語錄

第一五五冊

常憶在廬山隨時寄瓶錫五百與一千聚頭
同遣日猿攀影未回鶴望情還夫教他王老
師癡鈍無處覓

時雨灑如膏萬卉皆滋益枯根甘自休也似
春無力耕夫曉尚眠蠶婦夜多息從茲家業

荒共落風塵跡

送蘊歡禪者西上

金闕路曾遙行行值開泰石房雲未閑杳杳
若相待高蹤逾履水何人不傾蓋早晚承帝
恩再卜林泉會

送僧

春雲情既高片段飛虛碧去留機未消今古
望還積澄澄天影回杳杳地形直別夜共相
思誰栖此泉石

法爾不爾

綺七

夏雲多奇峯乾城冷相映借問諸禪僧那箇
堪憑定乾城高鎖月夏雲欲爲雨若謂非全
功子細看規矩

送諸方化主

空巖暖律回極目望還魯數點方外雲幾處

人間雨寥寥滄海月依依少林祖去必示勞
生清風立千古

劉禹端公問雲居雨從何來東平問官人風
作何色

雨從何來風作何色龍門萬仞曾留宿客進
退相將誰遭點額

風作何色雨從何來不用彈指樓閣門開波
波稜稜南方未回

送僧

松風清未休水月淡相對去來非等閑必許

孤雲會

頌雲門九九八十一二首

三三九九八十一一觀風隨召出千古有
誰同共知一毛師子衆毛畢

九九八十一大勲不豎賞若謂無諍訛金剛

持七

十一

曾合掌

烏龍和尚

空巖清夜坐蘚徑積深雪瞑目思古人徹曙
落殘月童敲石磬寒猿掛枯枝折杳杳無限
情分明向誰說

永樂北藏

明覺禪師語錄

第一五五冊

秋日送僧

邊鴈影邪寒蟬聲速乘時毳流遠別巖谷林
驚一葉芳微風觸袖水肅百川芳片月在目
因憶象骨老師曾送人行行不謂抽金鏃
早參示衆

曉天雲靜濃霜白千峯萬峯鎖寒色驪龍失
珠知不知無限平人遭點額

春風辭寄武威石秘校

春風何蕭蕭和雨復兼雪折華功未深偃草
勢曾烈毗城癡愛老怯寒對清拙裏巖影響

士難御同孤劣鼇峯人不來柴門亦休閉松
頭栗鼠下時把藤牀啣庭際霜禽歸屢啄苔
錢闕一旦春風息暖日生林樾幽徑磐石上
拄筇行且歇無絃芳莫彈有語芳存舌冷落
流水聲古之若爲說凋殘早梅樹今之若爲
別俯仰身力輕翻憶春風切爲吾吹却塵欲
革分岐轍爲吾吹却雲欲問遼空月不知天
地間堪爲誰交結

送百丈專使

大雄孤頂曾遐舉徧索諸方誰敢拒乳竇峯

前捋虎鬚再得完全又歸去

送清素禪者之金華

古策風高瓶浪闊春雲片段分清絕金盆後

夜孤頂寒去去誰同落殘月

擬寒山送僧

詩七

擇木有靈禽寒空寄羽翼不止蓬萊山冥冥

十二

去何極

送如香大師

梅檀葉落雨初歇天外風清亦何別後夜蓮

城溪月寒孤光誰共倚寥泐

寄于秘丞 二首

石徑通巖竇引步藏歌側蓬萊人不來掃盡

蒼苔色

飛瀑千萬層五月狀冰雪將期雲霧開永夜

對孤月

再成古詩

霜華一鑷中玉童摘未摘斯言如不聞千古

動愁色因憶商山吟在鳥不在白

答當生不生

咄咄休強名芻狗亦爲累寂寥金粟身曾未

永樂北藏

明覺禪師語錄

第一五五冊

求諸己

戲靠安巖呈雙溪大師

陝府鐵牛却知有春秋幾幾成過客一身還
作二如來黑白不分辯香臭

疏黑白無從

詩七

天地不仁萬化蠢蠢若謂非緣竹何從笋發

十三

兮髮兮黑白是準

暮冬感懷寄瑞巖禪師

雪水繞松檻遲遲結清淺病眼時懶開幽情
況難遣故人久相別飛文屢慚覲仰謝十二

峯分照月如翦

送知久禪者

霜竹凝寒携九節銅瓶浪鎖千溪月天上人
間不自知行行誰共分靖絕

送慶顏樞者

巖桂風清香露滴定起高秋映虛碧斷雲不
是歸帝鄉飛落人間有誰識

春日懷古四首

門外春將半巖水暖有聲玄沙曾未到虛得
偃溪名

門外春將半青青野色分桃華開欲盡無處
覓靈雲

門外春將半羣芳闌盛時鄰家有庭栢諸相
共相知

門外春將半幽禽語共新寶陀巖上客應笑
未歸人

送僧之金陵

勝遊生末跡杳自狎時羣卷袖消寒木揚帆
寄斷雲曙瓶華外汲午磬浪邊聞別後石城
月依依遠共分

送僧

知方流古意雲樹別諸鄰月不澄微水山應
立是塵靜空孤鷲遠高柳一蟬新欲究勞生
問歸思莫厭頻

千里不來

詩七

十四

不見古君子因循又隔秋浮生多自擲好事
更誰留碧嶽高沉月寒雲靜鎖樓宗雷何處
是白鳥下汀洲

僧歸雪上

海國浮輕櫂悠悠興未闌草隨春岸綠風倚

永樂北藏

明覺禪師語錄

第一五五冊

夜濤寒沙鷺宜相狎
霜蟾望更寬
河聲西聽日誰得共雲端

春晴野步

乘興携多士
遲遲傍水濱
春山不在目
啼鳥共誰聞
片石寒籠蘚
殘華冷襯雲
只應融老

輩庵際境猶分

賦瑞雪送穆大師

五六皆名出飄華
獨見稀若教同一色還似
負羣機玉馬猶空說銅駝
轉更非爭如千萬里相對共依依

送鐵佛專使

荷策來尋我
泛舟思舊山
不知何處月相照
在深灣
風助秋濤急
雲兼野樹閑
到時如請益
先憶趙州關

同于松丞賦瀑泉

大禹不知鑿來源亦自成色應鄰衆白聲合

讓孤清
遠勢曾吞海
飛流未噴鯨
靈槎如可

泛天派問歸程

送簡能禪者歸仙都

荷策下丹嶂
紛紛雪正飛
浮生誰未到舊國

自重歸雲背猿聲斷天遥鷄影微蓮城古風
月又得振清機

天竺送僧

雪霽蓮峯頂孤禪起石牀向時機自絕異域
路空長啼狖衝寒影歸鴻見斷行後期無定
跡煙水共茫茫

寄石秘校

重林冥坐久引望復遲遲煩暑未消日涼風
來幾時天雲飛積火巖溜散垂絲欲擬相尋
去浮生已共知

因事示衆

客從遠方來遺我徑寸璧中有四箇字字字
無人識清涵鯨海寬冷射蟾輪窄今朝呈似
看請道末後句

靜而善應

二首

覲面相見不在多端龍蛇易辯衲子難瞞金
槌影動寶劒光寒直下來也急著眼看

對揚殊特本同衆誰自遼空強指南今古不
存師弟子一輪秋月印寒潭

自誨

麟龍不爲瑞草木生光輝三尺一丈六且同
携手歸慚爾憇世師巍巍何巍巍

宗門三印三首

印空印水印泥炳然字義還迷黃頭大士不
識敢問誰得親提

詩七

十六

印泥印空印水市地寒濤競起其中無限鱗
龍幾處爭求出背

印水印泥印空袖手不辯西東撥開向上一
竅千聖齊立下風

革轍二門四首

劫火曾洞然木人淚先落可憐傳大士處處
失樓閣

德雲閑古錐幾下妙峯頂喚他癡聖人擔雪
共填井

祖佛未生前已震塗毒鼓如今誰樂聞請試
分回互

宛轉復宛轉真金休百鍊喪却毗耶離無人
解看箭

擬弋者慕

翠羽立高枝危巢對落暉碧潭千萬丈直下

取魚歸

透法身句

二首

潦倒雲門泛鐵船江南江北競頭看可憐無

限垂釣者隨例茫茫失釣竿

一葉飄空便見秋法身須透鬧啾啾明年更

有新條在惱亂春風卒未休

四七

十七

靈隱小叅

六合茫茫竟不知靈山經夏是便宜虛堂夜

靜無餘事留得禪僧立片時

因雪示衆

清光歆月不相饒堆積虛庭卒未消爲瑞爲

祥也難得不知誰解立齊腰

秘魔巖

把斷重津過者難擎拄須信髑髏乾藿山到

後知端的同死同生未足觀

保福四謾人

竿木隨身老作家逢場作戲更難加謾人謾

我無人會水長船高眼裏沙

靈雲和尚

本無迷悟數如麻獨許靈雲是作家借問徧

永樂北藏

明覺禪師語錄

第一五五冊

參諸祖客不知何處見桃華

僧問緣生義

義列緣生笑未聞孰呈布鼓向雷門金剛鐵

券諸方問報道三千海嶽昏

名實無當

王轉珠回祖佛言精通猶是汙心田老盧只

解長春米何得黃梅萬古傳

迷悟相返

霏霏梅雨灑危層五月山房冷似冰莫謂乾

坤乖大信未明心地是炎蒸

道貴如愚

雨過雲凝曉半開數峯如畫碧崔嵬空生不
解巖中坐惹得天華動地來

大功不宰

牛頭峯頂鎖重雲獨坐寥寥寄此身百鳥不

詩七

來春又過不知誰是到庵人

十八

晦跡自貽

圖畫當年愛洞庭波心七十二峯青如今高

卧思前事添得盧公倚石屏

五老師子

踞地磐空勢未休爪牙何必競時流天教生在千峯上不得雲擎也出頭

與時寡合

居士門高謁未期閑隈巖石且相宜太湖三萬六千頃月在清波說向誰

宜謙山主赴鄞城命

休向千峯過好時白雲高卧趣還卑塗中無限未歸客不待相依更待誰

庭前栢樹子二首

七百甲子老禪和安貼家邦苦是他人問西

來指庭栢却令天下動干戈

千聖靈機不易親龍生龍子莫因循趙州奪得連城璧秦主相如總喪身

贈琴僧

太古清音發指端月當松頂夜堂寒悲風流

詩七

十九

水多鳴咽不聽希聲不用彈

送僧

帆掛澄江雨霽時綠鋪春岸草離離定乾坤句輕相送逢著知音舉向伊

送僧之婺城二首

孤雲徒自類行蹤
高指金華思不窮
日暮輕帆映秋色
沙禽啼斷一江風

婺溪煙景稱生涯
輕泛蘭舟意未賒
八詠清風好相繼
碧雲流水是詩家

送文用庵主歸舊隱

太白峯前舊隱基
杉松寒翠滴無時
經年拋却又歸去
再聽巖猿只自知

送顯冲禪者之雪上覲兄著作

選佛選官應在我
難兄難弟不唯他
汀華岸草芳菲日
遠遠清風爭奈何

送寶月禪者之天台

春風吹斷海山雲
別夜寥寥絕四隣
月在石橋更無月
不知誰是月邊人

玄沙和尚

本是釣魚船上客
偶除鬚髮著袈裟
祖佛位

中留不得夜來來
依舊宿蘆華

偶作

拾翠尋芳烈夜燈
蘆芽穿膝笑無能
飛泉冷澹與誰聽
空落斷崖千萬層

送僧

路岐長草帶青青雲片相兼野思生多謝春
風莫吹散等閑爲蓋贈君行

送純禪者

莎蘿雨滴蒼苔痕前峯後峯啼斷猿携筇別

我下層翠何處靜敲仁者門

詩七

二十

和頑書記見寄

古松吟繞石磷磷湯惠休辭豈易聞紅葉寫
成藏不得暮風吹斷碧溪雲

送允誠侍者

飛泉列岫壓窮野冷碧寒青光闢射片雲片

石何太高爲誰留在長松下

送僧

古藤枝寒索索方倚靠又拈却海闊天遥非
等閑風前曾共孤雲約

送清禪者

瘦藤春雲深天涯去無侶時笑野泉聲似共
流鶯語落落風規今古情相逢會有知音舉
辭于祕丞

永夜潛思槁木身蓬仙門館漸經旬雖干清
政爲高客爭奈白雲無主人巖瀉瀑泉機未

息雨零寒葉夢猶頻此時賢宰容歸去古像
焚檀祝有因

送僧

涼飈新葉墜巖陰禪起高秋別翠岑孤月冷
光清有興斷雲閑影合無心瓶分吳浪情何

詩七

廿一

極鉢化膺門道更深好是却迴舊房日倚欄

同看橘鋪金

徃復無間

十二首

平旦寅朕兆之前已喪真老胡鶴樹漸開口
猶舉隻趺誑後人

日出卯萬國香華競頭走邯鄲學步笑傍觀
豈知凶禍逐其後

食時辰大嚮那堪列主賓維摩香飯本非設
怪他鷲鷲獨生瞋

禺中已荊棘園林徧大地南北東西卒未休

金剛燄復從何起

日南午寥廓騰輝示天鼓鬱頭藍已定全身
何假周行誇七步

日昃未碧眼胡來欺漢地九年計較不能成
剛有癡人求斷臂

晡時申急急逃生路上人草鞋踏盡家鄉遠
頂罩燒鍾一萬斤

日入酉室內覆盆且依舊塵塵彼彼丈夫兒
井中之物同哮吼

黃昏戌窠中不礙平人出瓦礫光生珠玉隄
將軍豈用驅邊卒

人定亥六合茫茫誰不在長空有月自尋常
霧起雲騰也奇怪

半夜子樵唱漁歌聲未已雨華徒說問空生
高枕千門睡方美

雞鳴丑貴賤尊卑各相守忙者忙兮閑者閑
古今休論自長久

送僧

巖泉高鎖黃金宅衲卷秋雲古標格離歌誰
贈欲行人徧界同爲一宿客春色依依日杲

廿七

杲南北東西好看好鬧市揆笑嬌尸迦草頭
青點俱胝老阿呵呵人間天上不知他羈竭
節有頂門眼歸去清風拂辟蘿

廿二

寄李都尉

水月拈來作者殊東西南北謾區區也知金

栗李居士端坐重城笑老盧

咄

寄池陽魯學士

山萬重兮水萬枝堆青流碧冷便宜算來免得生遥恨不在詩情在祖師

寄四明使君沈祠部

二首

露冕民謡物物成江山千里古風清曹溪客是無機者日在深雲聽頌聲

蒼蒼德也亦如斯政化全歸副倚毗十萬人
家寫春色不知誰解立生祠

寄內侍太保

二首

千尺巖泉噴冷聲草堂雲淡竹風清蒲團時倚無他事永日寥寥謝太平

蘿龕蘇室狎猿猱忽捧綸言掛紫袍恩大不知何以報五雲天上望空勞

寄曹都護

稿七

廿三

故國休言萬里程爲官爲釋且分明道存不必曾傾蓋俱有清風巾地生

送僧

虎角深藏不待時全機曾許雪林知如今百越拈來也草偃風行是信旗

寄靈隱惠明禪師

千峯影裏葉初凋。極望還將慰寂寥。也謂毫
端不相隔。秋雲秋水奈遙遙。

海嶠生片雲有時忽如蓋不掛飛來峯悠悠
擬何待

送益書記之霑水

白蘋汀是舊家鄉歸興蘭舟泛渺茫日暮沙禽啼欲斷不知誰在碧雲房

明覺禪師祖英集卷第五

音釋

領切 甌音零 甌音戒 占得切 毛充茂切 越月王切
 陰也木甌 他典切 檝即涉切 猱余收切 糲郎達切

永樂北藏

明覺禪師語錄

第一五五冊

明覺禪師祖英集卷第六

綺八

參學小師文政編

三寶讚并序

子天禧中寓跡靈隱與寶真禪者爲友或遊或處固以道義相揖投報相襲泠泠然自樂天常之性也一日真公謂子曰愚近偶作三寶讚三十韻宜請賡唱因披閱加歎率爾而繼之類蝕木也俄屬分飛吳楚將二十載殊不復記憶真公不以事曠誠隔遠遠附僧如行而至再窺荒斐愧慰多集且夫聖人之立

言也必睽虛必冥奧使文外之士同振古風垂千萬世又焉知來者及之不及道在其中也斯之讚辭曾不沾不待但退仰覺皇宗致禪徒告而行之得不曲爲序引

佛寶

甘蔗流苗應利塵覺場高發利生因紫金蓮捧千輪足白玉毫飛萬德身孤立大方資定慧等觀含類捨怨親挨星相好中天主市地名聞出世人螺髮右旋仙島碧月眉斜印海門新鸞翔鳳舞非殊品象轉龍蟠絕比倫瓔

永樂北藏

明覺禪師語錄

第一五五冊

珞聚中騰瑞色華鬘影裏奪芳春慈儀戀望
知何極梵德言辭莫可陳肖字香分無量義
頂珠常照百由旬雙林孰謂歸圓寂坐斷乾
坤日見真

法寶

後得智生功德聚大悲留演潤禽魚貫華雖
自科千品標月還歸理一如過量劫應期廣
布利邪心合未忘書四衢道內拋紅燄五欲
波中綻白蕖排斥衆魔登壽域引携諸子上
安車義天星象熒熒也辭海波瀾浩浩歟違

背此恩難拯拔遭逢末世豈躊躇聞來半偈
須相敬惜去全身莫共居飛辯恨曾虧激問
願幽欣且免長嘘生生頂奉輝心鏡廓照塵
勞信有餘

僧寶

方袍圓頂義何宣續燄千燈豈小緣華雨座
前猶滯相虎馴庵畔尚稽詮巖棲塚宿難依
望鶴貌雲心迥灑然寶杖夜鳴寒嶠月銅瓶
秋漱碧潭煙名標練若澄諠猾跡念昏衢警
睡眠林下雅爲方外客人間堪作火中蓮情

高不是超三際道在非同入四禪
浮世勉誰知逝水深峯甘自聽
飛泉苾芻草馥僧祇後
玳瑁孟傳古佛先珍重
覺皇有真子坤維高
步列金田

夏寄辯禪者山房

枕簟雲作屏必固黃金宅
軒窓月爲畫豈止
虛生白麟龍愧頭角
鵬鷄慚羽翮庶擬羣
類心在寬如在窄

和錢太博見寄覓山藥

二首

文柄誰持合自持
憂民風旣乍清
羸禪林草

藥如爲效願見皇家急詔時

聖君鴻業在扶持
日角龍章固不羸
搗藻玉堂歸未晚
百華開赴御筵時

送錢太博應賢良選

賢才當召試彪炳對吾君
千古不遺恨八元

詩八

應主文岸華明列
旂天籟拂微雲
後夜觀垂象中台位已分

答天童新和尚

中峯深且寒
欹接海邊島
松凋不死枝
華折未萌草
飛瀑吼蛟宮
幽徑分鳥道
伊余空寂

徒浮光寄枯槁冥遊天地間誰方可尋討孤
立雲霞外誰方可長保茲來仁者來還稱太
白老荷策扣巖扃重席展懷抱示我商頌清
休諺郢歌好報投慚抒辭難以論嘉藻
和頌

玲瓏巖古寺冠乎明越境海眼通冽泉天心
聳危嶺嘗遊興未闌遐想神忽凝彼士真覺
雄相鄰不孤迥吾愛濟橫流孰云煩慮屏吾
愛整顏綱豈止浮根靜棲梧瑞九苞追風駿
十影顧我不爭衡與誰開闢茗乘時旣磊落

照世非昏瞑佇爲王者師三千統摩頂
贈別太臻禪者

武陵山水何祕邃元化功兮不容易壇曾善
卷韜龍光洞亦桃華副麟趾仍思昔日吾祖
浩浩提綱宗消息曠斷寰宇空又聞高大舜
讓公器祥瑞却生蘆葦叢人由境兮冥道德
境有人兮分玉石臻禪本自偃殊方忽向其
中誕孤跡迢迢海甸來尋我一十二年同冷
坐羽翼搏風今是時拂盡天雲乃飛過
雲門俱字

百草頭何太極重與禪徒下鉅刺雲門俱字
好叅詳雪峯輓毬亦端的然非青兮藍一色
辰錦砂号敢言赤紫羅帳裏有真珠曹溪路
上生荆棘還會麼此時若不究根源直向當
來問彌勒

詩八

僧問四賓主因而有頌頌之

四

如何是賓中賓云滿面埃塵又曰噫

頌

賓中之賓少喜多瞋丈夫壯志當付何人

如何是賓中主云兆分其五又曰引

頌

賓中之主玄沙猛虎半合半開唯自相許

如何是主中賓云月帶重輪又曰收

頌

主中之賓溫故知新互換相照師子頻呻

如何是主中主云大千捏聚又曰揭

頌

主中之主正令齊舉長劒倚天誰敢當禦

都頌

賓主分不分顚顚絕異聞解布勞生手寄言

來白雲

令僧把袖

七八既難直須教透來不在前去不在後
麤細自看緊緩相就一日圓成呈似君想得諸
方未知有

詩八

五

送知一入京兼簡清河從事

六月千江水似秋片帆高掛岸雲收行行莫
謂朝天闕況倚文星在巨舟

送德珉山主

溪山春色映雲袍愛住隍城意轉高翻笑忘

機自安者不能垂手入塵勞

送僧二首

紅芍藥邊方舞蝶碧梧桐裏正啼鶯離亭不
折依依柳況有春山送又迎
祖域高親日未央家林歸去意何長舊交不

識初相見曾振滄溟奪夜光

送崇已閣黎歸天台

石橋雲瀑冷相侵薛徑蘿龕入更深却羨攜
筇遠歸去半千尊者足知音
送邃悟上人之會稽

百越江山冠九州如屏還媿謾相褒惠休此
去多吟賞贏得清風價轉高

送僧四首

乘興飛帆別翠峯水光春靜冷涵空到人若
問曹溪意只報盧能在下風

禪石飛流濺碧莎利生還喜下雲坡途中若
立三千客剔起眉毛不在多

梅檀林裏振金毛四顧清風拂幾遭曾許全
威作雲雨不知何處是塵勞

雲衣輕拂下層巒松檜生風觸神寒誰問親

遊乳峯意百千年後與誰看

寄員外黃君

碧岫層層列杳冥漣漪環繞貢寒青韜藏未
識古君子空仰嘉聲過洞庭

送僧

約八

五色祥麟白月輪乘時應不念離羣松根不
上未歸日誰看暮山飛斷雲

六

寄劉秀才

遠遠飛來一幅書愈風誠重複何如相逢相
見未期日目斷千山插太虛

送僧

古之別今之別目對春江倚寥沈三樹兩樹
啼斷猿千峯萬峯落殘雪華濛濛雨濛濛坤
維步步生清風
聞百舌鳥送僧

曾來芳樹幾回飛煙靄初晴又見伊巧語向
人莫相笑知音知後更誰知

送中座主入廣

船主船中寄惠持雲霞無跡共依依海山見
說多嘉賞莫便因循忘却歸

送隴西秀才入京

國器難藏孰可知携來書劍莫遲遲明年桂
籍登文陣奪取龍頭更是誰

送僧

雪殘春島路迢迢水靜雲開見碧霄別後誰

同此深意只應孤月共寥寥

因仰山氣毬頌

四大假合非虛妄儼儼侗侗爲一相東西南
北不相知留與衲僧作榜樣
赴翠峯請別靈隱禪師

臨行情緒懶開言提唱宗乘亦是閑珍重導
師并海衆不勝依戀向靈山

送僧歸閩

雪老當年曾入嶺真禪今日又思鄉孤帆隱
隱曾唯我月照夜濤空渺茫

送僧

春風颭颭華正飛紅霞碧靄籠高低越山日
暮少林客應聽子規深夜啼

寄陳悅秀才

水中得火旨何深握草由來不是金莫道莊

生解齊物幾人窮極到無心

寄錢塘觀音朋山主

遠念依依闕附書還同秋水淡相於冲雲泥
是曾無定幾掩寒蟾出太虛

送僧

極目春光水照空岸莎汀草碧茸茸三千里
外生靈望獨倚寒藤振祖風

春日示衆

二首

門外春將半閑華處處開山童不用折幽鳥
自啣來

門外春將半開華處處開山童曾折後幽鳥
不啻來

寄烏龍長老

雪帶煙雲冷不開相思無復上高臺江山況
是數千里只聽嘉聲動地來

詩八

八

寄太平端和尚

千朵危峯杳靄間石房長帶瀑聲寒鳥啼華
發尋常事松本青青雪裏看

送僧

千峯雨雪時別我情何極不知天地間更有

誰相識

因官人請陞座

曉天雲靜冷涵霜滿檻風清敵夜光莫謂座
間人不識孤明孤影射虛堂

因金鵝和尚語藥病

藥病相治見最難百重關鎖太無端金鵝道
者來相訪學海波瀾一夜乾

賦冲雲鷄送僧

側翼雄飛天勢闊電閃星流太輕脫南北東
西相對看千里萬里阿喇喇

風旛競辯二首

不是旛号不是風
衲僧於此作流通
渡河用筏尋常事
南山燒炭北山紅
不是風旛何處著
新開作者曾拈却
如今懜懂癡禪和
謾道玄玄爲獨脚

詩八

九

漁父

春光冉冉岸煙輕
水面無風釣艇橫
千尺絲綸在方寸
不知何處得鯢鯨
牧童

嘔啊唱與那嗚咿
百草拈來聞不知
日晚騎

牛未歸去指前波
笑又噓噓

送僧

巖房高下拆寒梅
極目寥寥鴈影回
相別相逢竟何事
一聲江上發春雷

寄天童凝

經旬抱疾阻春霖
莎砌重重蘚暈侵
曾約偕遊未能得
暮山空鎖碧雲深

送僧入城

雲籠碧嶂月籠臺
此去城中早晚回
不爲佛光謁韓愈
問君何事出山來

病中寄諸化主

雪裏梅華見早春
東西南北路行人不知何處圓
蟾夜同念山頭老病身

和于祕丞見召之什 二首

民瘼求來吏放閑
萬家深夜啓重關
齋中旣

是清涼國應笑支公別買山

垂垂甘自養衰殘
度歲無人到竹關
何幸文

星枉嘉什殷勤相喚出層山

和王殿直見寄 二首

華野非殊古所難
得安閑處未爲安
大方無

外誰相到空笑重雲鎖碧巒

清風凜凜字人官
堪對彌天釋道安
不日歸朝狎鴛鴦也須音問寄層巒

送僧

澄江依棹碧光流
風冷蒹葭雨乍收
別夜新

吟許誰約白蘋汀
上月陵秋

第八

十

送僧歸永嘉

韶石曾披此性靈
三年孤與急流爭
永嘉舊

隱今歸去堪聽海濤中夜聲

兔角拄杖

少室傳來兔角杖，千聖護持爲頂相。虎踞龍蟠勢未休，雲影山形冷相向。有時閑倚在虛空，寥寥市地凝秋霜。有時大作師子吼，德嶠臨濟何茫茫。今日提來還不惜，分明普示諸知識。解拈天下任橫行，高振風規有何極。

送從吉禪者

君不見行路難，亦容易。握草爲金不爲貴，難曾平地湧波瀾。易復到處列祥瑞，堪笑堪悲能幾幾。天上人間立高軌，兄弟十字越參星。一義同心淡秋水，因憶韶陽古風骨。石火電

光遲出沒，隔身之句是程途。扣門之問非窠窟，殷勤報君君記取。方外周遊看爪距，虎狼叢不遇知音。剔起眉毛便歸去。

寄承天長老

道義相資復是誰，巖房深夜思遲遲。海山雲

靜見孤月高照，綺八婺城人不知。十一

送僧

古路枝分列洲渚，綱兮領兮若爲舉。病眼方開忽送人落華，驚斷山禽語。親禪客親禪客，行復行獨步。坤維消此情。

送因大師

瘦藤清對紫方袍
閑步坤維意轉高
若到慎

江人借問金輪王子是吾曹

送實師弟

天倫曾重意難分
爭奈孤蹤若斷雲
去去休

同亮禪者西山一入杳無聞

送新茶二首

元化功深陸羽知
雨前微露見鎗旗
收來獻

佛餘堪惜不寄詩
家復寄誰

乘春雀舌占高名
龍麝相資笑解醒
莫訝山

家少爲送鄭都官謂草中英

賦月生雲際送誠監寺

皎潔離雲鶴夢時
孤光還與雪相宜
金盃後

夜重垂影拂盡天風不自知

送僧之金華兼簡周屯田

瘦藤輕屨薛衣并
路過危峯截杳冥
若到金

華拂雲霧不應容易見文星

送僧之永嘉

故園不是阻天涯
華木光中見獨歸
蜃水鄞

江人莫問月分春
浪冷依依

寄送凝長老

德不孤兮必有鄰四明留住是因循如今高
步錢塘境只許靈山箇老人

放白鷗

朱冠青戩雪爲毛不近鸞凰意亦高放你雲

詩八

十二

林莫迴首如今何處是仙曹

喜禪人迴山

別我遊方意未論瓶盂還喜到雲根舊巖房
有安禪石再折松枝拂薜痕
送僧

七尺巖藤握便行舊山歸去幾多程相逢忽
問迢迢意應發春雷動地聲

送僧歸天童

峩峩太白峯倚翠列霄岸羨君乘興歸凭欄
與誰看

和曾推官示嘉遁之什

少微星出古風還市地聲光不掩關三館峻
遷同陌路九華高卧是蓬山巖莎步入梓麟
穩海樹飛來白鳳閑只恐致君休未得蒲輪
重到薜蘿間

經古堰偈作

出城四十里古堰若天外飛棹清淺中孤影

自相對

謝張太保見訪

老病還同葉半凋經旬門掩夜蕭蕭海城都

護曾垂訪一片清風慰寂寥

詩八

十三

送宗朴禪者

洞庭乳竇皆泉石抱疾何緣寄幽跡曾列狂
機一二三東山西嶺非相識屈指嚬眉不可
尋雲飛雨散空沉沉如今轉覺流年隔強把

冥慘苦搜索縱止言欺白雪辭寧忘笑與黃

梅客朴禪者朴禪者珠月有光慚照夜

送尚辭

浮屠之子履道爲貴天号地号何泰何否動
無飾非靜還雕僞辭也云行後生可畏

歌寄留英禪德

當時臨濟辭黃檗或指河南或河北英禪此
日下中峯机案曾焚笑仍則九苞一角慚稱
瑞導月觀星亦非意爭似韶陽振古風半途
未肯還希冀歸去來歸去來飛泉浩浩聲如

雷

送小師元賁

愧爾求師爲吾弟子學雖無聞道亦可擬平
飛辯月照復流水斯意斯言兮如不忘行行
颺颺兮步蘭芷

善應殊宗吾不知也思之

送丈佶歸廬嶽

春色未深興無遲早瓶謝九江峯尋五老到
日攀蘿獨上時依依莫忘海山腦

送侃禪者之丹丘

石橋多古跡路嶮少人過如同白日閑冷拂

青苔坐寒老若相逢爲吾略嘲破

送寶山主

野水春山風光極目千里萬里太遲太速絕
域澄澄兮非犀炬可照希聲杳杳兮非鳳膠
可續葉落華開知不知人天景行爲高躅

詩八

十四

示衆

丫角女子白頭絲報你諸方作者知借問住
山何境界春風颺颺春鳥喧喧翠峯不能助
發心印却是他傳

和范監簿

二首

吏散簾垂思莫窮山光溪影恣相容誰誇靖
節偏栽柳自笑隱居高聽松丹闕尚遙芝檢
密訟庭閑列薜蘿重巖間野客雖多病終再
携筇謁士龍

品彙不自適善政還可尋縣樓清夜上島月

思雲侵誰有古菱華照此真宰心

因香嚴和尚

我有一機禪子須知爍迦羅眼總是膠鶻若

人借問伏惟伏惟

送雄直歲

罷叅還欲勘諸方竿木隨身不易當是則俱行非則
下翻憶古來興化老主賓用盡力牽羊
爲道日損

三分光陰二早過靈臺一點不揩磨貪生逐
日區區去喚不迴頭爭奈何

疏古

爲八

十五

我有面鏡到處懸挂凡聖不來誰上誰下
訪俞秀才

萬疊雲山未得歸寂寞心許老盧知江城雨
雪書名紙不謁鴻儒更謁誰

再訓

萬卷無書道用歸閑文公也未須知倚天長
劍如重戰更有龍頭復是誰

留遲首座

從龍爲雨復清閑片段依依水石間慚問秋

風欲吹散不能留得覆青山

不慚問者
爲我留之

送俞居士歸蜀

何處深棲役夢頻青城拋却數溪雲如今老

大歸難得只寫情懷遠送君

和聖殿丞蓼栗種之什

纖纖圓實占芳春得自侯門勝楚珍開葉開

華人不曾百千年是等閑身

和江橋晚望

公餘縱目望江山萬化窮來罔象間聞說聖

君將下詔未容清淡與僧閑

病起示衆

門掩還同歲月摧石窓經雨積莓苔一牀枕

簟淨名老時見斷雲孤月來

送麻居士

紗帽山儀白苧袍遠披孤頂近吾曹携來七

尺霜前竹劃斷天雲不放高

醉李校書

一回辭我一回吟
戀巖叢意轉深
翻謝霜

松不凋落與君同有歲寒心

苦熱中懷寄永固山主

詩八

火雲高下影相連
幾欲披尋恨不前
無限清

十六

風無處問只應遲步繞林泉

送元安禪者

羣峯杳藹留不住
遠道依依只藤屨
舊隱蘿

龕付與誰寒猿後夜啼高樹

賦病鶴送奉倫禪者

欲飛飛未得
冷泊杉松枝
如何垂天雲
遠遠

同一涯

偶作

列岫霽新雨
凭欄只澹交
夕陽明遠水
秋葉

露空巢思極
曾無玷神清
未動爻只應
千古

意誰得共雲坳

謝鮑學士惠臘茶

叢卉乘春獨
讓靈建溪從
此振嘉聲使
君分

賜深深意曾
敵禪曹萬慮
清

因遊育王亭寄牧主郎給事

冷翠千萬峯當軒列如黛蒲團及禪板永日
澹相對彤雲曾無機燒松亦成蓋遠謝幽隱
情難與台星會

送遇能禪者

三八

湖繞嚴城列象寬萬家臺榭水光寒片帆隱
隱生遙極誰問曹溪意轉難

送覺海大師

秋雲巖葉兩悠悠半逐風馳半水流憑問禪
家有何意不知方外若爲酬

送曾侍禁

冷匣秋波射斗星鐵衣隨從古霜清宣池莫
問當年事一片威風動地生

病起酬如禪德

大明一寸光腐草一何假人命呼吸間誠哉
是言也呼之曾已休吸之尚未舍寄問諸苦
源來者不來者

送雲禪德

古之送人言作懷寶我慚老病困乏辭藻熊
嶺迢迢芳曾立夜雪謝池依依芳笑生春草

頭角麟龍安可論清風步步應相討

送父禪德歸蘭亭

右軍墨池月照我復照誰千里忽相到中峯

多病師

送義大師

巖房抱病經一月門有諸生阻來謁長往之
期猶未能七十之年更何說若耶溪老忽留
語溪上舊遊且歸去春風颭颭兮兼斷雲弱
柳依依兮帶輕絮古今離恨雖如此動靜於
吾亦多意高握霜筇獨步時音書莫忘遠飛

寄

酬海宗二侍者

二首

蓀之得蘭其道匪難扶吾病起如珠在盤一
兮二兮自看誰看

蘭之得蓀其道必存扶吾病起古風入門二

詩八

十八

兮一兮且論勿論

謝郎給事送建茗

陸羽仙經不易誇詩家珍重寄禪家松根石
上春光裊瀑水烹來聞百華

送山茶上知府郎給事

穀雨前收獻至公不爭春力避芳叢煙隔曾
入深深塢百萬鎗旗在下風

送郎侍郎致政歸錢塘

帆掛西風別海城二疎千古道相應誰誇宮
貴沽時譽自笑經綸作技能殘葉賦題紅片
片遠山供望碧層層武林到日符嘉遁高訪

巖扃只許僧

山行逢勲禪德

乳巖秋日無他作策杖層層止寥廓四顧有
誰分野情一點彤雲起深壑蘚石遲遲略輕

踞逢箇衲僧忽驟步頻笑回頭不肯回及至
回兮眉卓豎阿喇喇千里萬里橫該抹咄
送小師元括

老盧之子四三二一將欲振飛卷比叢室松
凌霜兮運青水帶巖兮流急南北東西雲開

見日

詩八

十九

永豐莊新植徑松忽二本鄰偃杼辭紀之
雙偃松何似螺文結數遭清聲雖競發寒影
不相高對客圓分蓋孤禪翠滴袍若教圖畫
得爭奈有蕭搔

送白雲宣長老

鄞江秋晚忽成春況有台星作主人去去高
携古刀尺二千年運續芳塵

送親禪者

萬木帶秋聲古今念睽別我有贈行意臨行
爲君說重巖休滯雲遠水且觀月生生知不
知天風助清徹

送顯冲禪者

聚散非常準古今亦漂裕如何無事人還似
未歸客秋風生羣林野水資寒色誰兮謝寸

陰觀彼青山白冲禪行復行五葉待時拆
送天童晉和尚

迢迢別海涯帆掛杪秋時島樹落寒葉人誰
訪祖師浪開遊象急天闊過鴻遲早晚歸林
下千徒不共知

張秀才下第

得第何人愧不平道存顏巷亦爲榮應知未
喪斯文也且把新詩樂性情

寄久監收

田中稻熟及時收顆粒圓成免外求一日歸

來古巖上白雲紅樹共悠悠

暮冬夜坐寄岫禪者

碧落無片雲虛庭積深雪負春還有誰微曙
對孤月巖松影拂翠不斷瀑水聲來聽忽絕
岫禪岫禪知也如未知八面清風遠遠待時

詩八

二十

說

寄崇壽懷長老歌

寂住峯兮觸星斗寂住師兮古爲道死中得
活未輕訓不許夜行投曉到藹藹聲先一百
年吾其後兮吾其先振領提綱笑多事掩扉

塞路空依然龍朔老盧同兀兀土爲貌兮金
作骨萬國爭求肯便行我要重新敲鐵佛東
西南北休云識枯槁冥冥頗相憶天外清風
結陣來狂歌遠寄從拋擲

送廷利禪者

雪峯孤頂誰家路上兮下兮復何故曾列三
千一半徒我今獨滿當時數鯨鱗龍鱗鱗
坤維高步生清塵休云裴相慕黃檗顏有圓
珠七尺身利禪者利禪者倚天長劍應牢把
或謂風雲不再來誰爲蒼蒼分晝夜

送倧禪者

涪江怒激鯨鼈宅
岌岌三山大傾側
冥數俄然一箇來
步武羣方作禪客
振聲謂我分綱宗
今兮右兮何忽忽
今吾強爲挾辭句
句句字字凜凜生
狂風拂散四七單
傳之落葉掃蕩
二三直指之流蓬
似帶微芒敢未勦
絕寒木在握兮全
機可笑秋水橫
按兮半提可滅
使八極頂目者
不自爭衡見斯
人兮駕御昂
赫

送鼎禪者

落落禪家流
携筇卷雲毳
別我振辭鋒
夜堂消祖偈
鼎禪之句霜天飛一鷲
目對彈其滯
春岸立千峯
指也乎其勢
行行復行行
清飈起蘭蕙

觀泉送演禪者

雲根漱野泉
照空復照月
冷聲曾未消
飛瀾似相別
巖近生風雷
天遙新冰雪
演禪乘與知
不知源流依依
共澄潔

答忠禪者

一字七字三五字
萬象窮來不爲據
夜深月

白下滄溟搜得驪珠有多許

和陸軫學士夏日見寄

良牧歸詩匠雅風消鬱蒸官清難滯爵吏散

遠同僧棠樹非煙合仙槎碧浪乘因思窮萬

化使君早製圓明鑑圖冠之序引或聞或見令人曠達千古更無能

送化主

春色依依籠遠樹卷衲揜藤躡輕屨塵世茫

茫無限人不知誰問曹溪路

送通判劉國博黃中

爲星當貳職權化不相饒白屋如多恨清風

永樂北藏

明覺禪師語錄

何處消岸鷗窺列旆天辟看陞朝別有生靈
意寒枝未變條

送別陳秘丞古意

悠悠層山雲斷号仍復續離離雙岸草變号

且兼綠如何苦雪霜後凋蠹松竹松竹有節

操雪霜無伎倆敢折歲寒枝贈君作嘉賞行

行天地間清風在誰掌

送通判學士歸南國楊

旆擁帆開照德星天風高興國風清武夷仙

仗知回也各下祥雲到地迎千里之外應之非此則殊待者也

第一五五冊

和酬郎簽判殿丞

向國心存了了身大方無外且同塵江城早晚重相見解笑宗雷十八人

歌送范陽盧君兼簡華嚴昱大師

范陽居士來鄞水動地仙飈向人起乳峯直

上雲霞開步驟天衢到如此茫茫塵世誰知

交當場問我非相饒禪家畢竟無他事古雪

巖前曾未消俄然悵望辭叢室荷石難兮淚

深溢遠幸流方且莫論再得從容又何日迢

迢故國殊存想冷碧柯山分指掌況有覺雄

華藏師歸去百城共遊賞

送廣教專使

我我石頭使乎讓祖己之匪存聖之奚慕或妄以山或索云斧音耗不通兮清源派分吾斯語兮詎可論古

送微文章

納八

廿三

雙蓮亭上送行客萼萼清香散秋色野興斷山雲片高孤影澄江月華白希聲險絕堪誰知大道機存曾未可縱闢天常立下風安教類變叢流火君不見梁兮闔國難滯留千古

遺恨空悠悠君又不見魏芳小桂生寒翠一
華對雪開無休微禪亦並聯芳駕德星文星
仰蕭灑物外情深不等閑環中趣別非輕捨
相訪從容爲我言屈指多求更何者
送懷秀禪者

麻衣草座思靈徹一食安閑更無別條忽還
流數百年杳杳誰來繼其絕吾芳亦是疎慵
輩冷澹身心存懽愜偶續靈峯照夜燈遽泛
鐵船下滄海深嗟知因不知休奔馳駭浪空
淹留縱得長鰲擬何待堪白頭時好白頭因

觀壞衲秀禪客清苦如冰復如磔別我携筇
步大方爲葉爲華恣披拆伏枕寥寥情意關
率寫狂歌贈行色

孤運銘

雲根石廣容身待老南來北來閑且尋討五

葉一華芳堪對誰寥寥萬古芳空知有

寄海會之長老

百華開後一華開風通清香遠遠來誰問黃

梅不平事照中依舊惹塵埃

雜言送賢專使

使乎誰老作者百戰場中飛鐵馬秋水藏來
人不知笑李將軍被擒下阿呵呵却歸湖山
唱凱歌

歌紀四明汪君信士

古君子兮道諸己道器用兮合天理同塵還

詩八

廿四

若待時生觀象不知何處起荆叢叢叢叢
叢孝兮悌兮非汴中聚應落落滴仙露散或
泠泠揚士風風之上兮風之下近一指兮遠
一馬秋水澹交無限情夜光照乘胡爲者伊
予匪謂存餘力詠高義兮困宵臆已歌百字

巖葉書飛寄汪門舊知識

送仲卿禪德

高兮竺卿秋水虛明夫何之象堪云指程知

吾不知笑

理出情謂
五撫掌爾伽耶城

真州資福禪院新鑄鍾銘并序

國朝紫微舍人趙公丙戌年出鎮姑蘇裁情
示空巖之客所恨不能効善財展轉南方以
求先覺如別幅叙雲裁長老令僧惠敏造鍾
既成勅重樓以簾之欲爲銘記且言當使學
者有所警悟槩也縱能道其歸禪人惡肯信

惟師爲善知識行重名當代願爲此銘因機
垂化不亦美乎然重顯固陋荷大君子外獎
敢不從命輒復引寄夫形聲未先曠默奚准
器用之後幽靈絕常故聖人以鍾爲大惟聖
人則之襲考忘考求以深矣其能具諸種智
第八
對飛雄辯但未兼極有生權化之來未易窮
廿五
也感通傳稱昔拘留孫於乾竺造青石鍾如
青玉色可容十斛頂類諸天腹陷衆寶八角
四面華光互分有化如來與日偕出明宣祕
演或聞不聞王舍城中大千界內匪同鐺鐺

者乎今嶽禪老於淮甸造青銅鍾如青珠色
過百鈞之用上旋旁植繞獸蹲熊其或層城
畫閣祇園夜永寥寥霜月射寒影以爭輝殷
殷地雷發虛音而交振師之唱險資之繼難
寅夕鏗鏗主伴索索足使一鱗半甲無違真
化之方二聽五觀有寄神遊之域善存殊應
扣惟良哉謹爲銘曰
淮之要衝 眞之會府 中列梵庠 居我禪祖
衆徒駢羅 慧敏千楮 爰構鯨音 息彼輪苦
峻橫崇臺 金飛碧回 斯門屢掩 向人或開

希兮微兮 作延乍催 先聞未及 後時不來
增悲遐宣 無困天理 帶識萬端 警悟齊起
遵晦陟明 其母得子 塵塵訪誰 刹刹問已
大緣斯成 大功不宰 君奉禹湯 臣仰元凱
碑勒紺園 銘寡文彩 庶期妙峯 永登滄海

明覺禪師祖英集卷第六

明州雪竇山資聖寺第六祖明覺大師塔銘

尚書虞夏外郎直松閣兼充帝昫詩賜維魚袋呂希哲

夫真空不空是有無證寂滅不滅是往來相
佛以權實一法開頓漸之徑使隨器而趨之
有不離道場得大智慧有難行苦行爲人天
業日月爲明矣而盲者不見睫毛舟楫可濟
矣而溺者淪於波浪人之未有惡明而忘濟
者其心一也其途異矣昆歧之性羣行食啄
倦則息觸則避求所以安樂不待教而能也
人之於貴賤貧富壽夭得喪不知自然之分

愛惡悲欣廉貪靜躁糾纏桎梏無所解脫晝
勞形骸夜動夢寐至于老死且不知息彼昆
蚊知所以安樂人顧不能也佛之教人推性
命之際以極天地之外乃至觀身如掌中物
傳付法寶不寫文字是謂禪那山嶽之大有
時而泐金石之剛有時而剝形器之用也我
則異於是無去無住無取無離不見于內不
見于外不見中間自利義也利他仁也是謂
涅槃妙心諸佛法印無上微妙秘密圓明眞
實正法眼藏佛以授摩訶迦葉傳僧伽梨衣

以待補處出世爲成道之符自是衣法相傳
二十有七世香至王子初入中國謚曰圓覺
圓覺傳大祖大祖傳鑑智鑑智傳大醫大醫
傳大滿大滿傳大鑑大鑑藏衣傳法而已大
慧繼之大寂承之其後皆以所居稱若天皇
續八
龍潭德山雪峯雲門香林智門其世次也禪
師諱重顯字隱之大寂九世之孫智門之法
嗣也俗姓李氏母文氏以太平興國五年四
月八日生大師於遂州始生瞑目若寐三日
既浴乃豁然而寤屏去葷血不習戲弄七歲

有僧過其門挽持袈裟喜不自勝聞梵唄之聲輒泣下父母問其故懇請出家父母執不可師不食者累日咸平中終父母喪詣益州普安院仁銑師落髮爲弟子大慈寺僧元瑩講定慧圓覺疏師執卷質問大義至心本是佛由念起而漂沉伺夜入室請益徃復數四瑩不能屈乃拱手稱謝曰子非滯教者吾聞南方有得諸佛清淨法眼者子其從之彼待子之求也久矣師於是東出襄陽至石門聰禪師之席居三歲機緣不諧聰諭之曰此事

非思量分別所解隨州智門祚禪師子之師也師乃徙錫而詣之一夕問祚曰古人不起一念云何有過祚招師前席師攝衣趨進祚以拂子擊之師未曉其旨祚曰解麼師擬答次祚又擊之師由是頓悟尋徃廬山林禪師道場問之曰法爾不爾云何指南林曰只爲法爾不爾師遂拂衣而退衆皆股栗有毀於林者林諭衆曰此如來廣大三昧也非汝等輩以取捨心可了別也師辭徃池州景德寺爲首座爲衆解肇法師般若論知州曾公會

以果子抵于地曰古人云不離當處常湛然
即今在何許師指景德長老曰只此長老亦
不知落處曾公云上座知也不得無過師曰
明眼人難瞞師南遊杭州住持蘇州洞庭翠
峯嗣智門也未幾曾公出守明州手疏請師
住持雪竇資聖蘇人固留不可師曰出家人
止如孤鶴翹松去若片雲過頂何彼此之有
雪竇本智覺禪師道場智覺亦雪峯五世孫
備傳琛琛傳益益傳韶而壽繼之智覺其號
也一法同源而地有盈虛師之至猶家焉決

卅八

廿八

潢汙變清泚掖蹕僊爭迅馳州邦遠近輻輳
座下駙馬都尉和文李公表錫紫方袍侍中
賈公又奏加明覺之號師住持三十一載度
僧七十八人先是門弟子建壽塔於寺之西
南五百餘步一日命侍者灑掃塔亭行至山
椒歷覽久之曰自今過此何日復至左右皆
大驚衆迎師還師堅指塔所衆皆號泣隨至
塔前或曰師無頌辭世耶師曰吾平生患語
之多矣翌日出杖屨衣盂散遺其徒有問疾
者留食殷勤與之約曰七月七日復來相見

其夜盥浴整衣側卧而滅時皇祐四年六月十日俗壽七十三僧臘五十夏以七月初六日入塔如師之約嗚呼師得妙用善機不取諸法能知去來達性命故方是時陞堂皇遊墻藩者悟性相體空頓息萬緣爲大乘法器

師人

十九

曰義懷在和凡百五十人傳其法於天下彼遮護意根網絆初心背覺合塵逐念流徙得少爲多妄立知見雖三詣投子九陟洞山師亦援手濡足而無以救之是猶孔子之有宰我孟子之有盆成括非其師之過也自師出

世門人惟益文幹圖應文政遠塵允誠子環相與哀記提唱語句詩頌爲洞庭語錄雪竇開堂錄瀑泉集祖英集頌古集拈古集雪竇後錄凡七集師惠語之多而其徒愴然猶以爲編摭有遺蓋利他之謂也余得其書而讀之二十餘年雖瞻仰高行而祿利所縻無由親近使得稽首避席霑彼法雨覺陪塵勞庶幾可教者今蔑如之何師辭世十有三年碑表未立餘杭僧惠思撰行業錄與其徒元圭覺濟大師悟朋繼踵裒文請銘以予跋慕之

心重之以門人之請之勤抑有待耶愚公叩
壤以移山雖不量力其誠則至矣謹焚香再
拜繫之以銘曰

噫蠢愚 背本源 一念異 生二根
勝與劣 駟馬奔 嗜所得 自詐譖

失大道 南北轅 艾至老 愉朝昏
正徧覺 人天尊 迷者挽 溺者掀
朝瞰出 慧靈雲 渴得漿 寒得薪
悟報化 知非真 趣安隱 擺客塵
王叔生 廣佛事 破六宗 應彈指

法來東 非會際 信衣傳 隻履逝
頂五山 眞法器 立積雪 殊其臂
忍非忍 得法髓 債必償 有裔嗣
皖公潛 佛日翳 翩南遊 立如櫛
乞解脫 彊哉慧 攘蜂蠆 神獄衛
破頭峯 衆雲從 橫六氣 醜二宗
教任意 任懶融 黃梅兒 陌上童
闕七相 了諸空 聖服勞 杵臼傭
和心偈 拊爭鋒 夜南驚 懷是逢
帝稽首 睇下風 舟復新 葉歸叢

永樂北藏

明覺禪師語錄

第一五五冊

有道得 無心通 世有承 四衆依
燈相續 塤應窟 師異稟 自孩提
斤腴雋 蹈聖梯 慈固拒 不得施
起恭孝 終道緣 銑落髮 瑩質疑
漢之東 得我師 扶盲瞶 柞荒菑
昔無有 今委蛇 遇露洽 發萌莢
淫龜鳴 鍾未簾 魚目藏 明珠吐
歸二山 下檐聚 來萬里 足蘭蹠
旬春雷 披鰲戶 辯縛解 決去住
沃醞酬 斟甘露 百五十 胃蕃廡

窮車轍 誦句語 瞻骨目 軸繪素
遠胡越 近杖屨 捐麤相 悉開悟
山第鬱 泉呬幽 虎跡交 魁猱啾
塔門闕 松栢樛 天南垂 海彪彪
囊破褐 笈單綢 來環繞 五體投
名彊身 祿飽喉 狃怨憎 甘鮑鱗
睨真乘 等贅疣 慶我生 辯薰蕕
斲誘掖 邈無由 琢堅石 攄我憂
治平二年乙巳歲二月五日

